

清容居士集
附札記

九





清容居士集

附札記

(九)

袁 桷 撰

清容居士集卷第二十

墓誌銘 墓表 葬記附

宣武將軍壽春副萬戶吳侯墓誌銘

往者壽春爲宿亳要衝。犬牙相承。城郭樓櫓。移易無常。所草舍殘缺。狐兔出沒。道途間。築覆土窖以避。妻子短兵迎接。利不利不復計。猶持農器治田壤。惴惴求活。歲率如是。世祖皇帝以天兵取江南。捨兩淮爲最後。至元十一年冬。渡江。十二年。平江東。抵錢塘。宋社告亡。十三年。兩淮爭奉地圖以降。無鏃刃之費。天下大定。而淮始得爲樂土矣。當是時。吳侯祐以壽春歸職方。其子安民。字惠卿。侍父居。顏行率部伍。招輯潰卒。控曹橋。下獨松。渡越江。略定會稽。台溫三城。南踰閩嶺。拔莆田。擒將李雄生。俘其守臣。而以功歸其父。二大帥曰。吳氏子宜第其戰多。別有以賞勵。乃署千夫長。十四年。父卒。始襲爵。佩金符。爲管軍總管。鎮揚州。十八年。大治兵。伐日本。拜疏請行。授宣武將軍。征東副萬戶。領淮東西兵。以先舟師抵其國。八月。颶風大作。器械軍士。沈溺物故。御破舟。亂流以經海島。高麗日本二國。常不相能。遇高麗選人。問所以。載與還。而先帝亦厭兵。罷征矣。二十年。建黃華反。奉命往討之。至政和縣。獲賊將。度九峯嶺。接戰益急。得其僞署圖籍。虜驍將以歸。十有二月。昧爽。進軍平溪。華盡死力。拒砦赤巖山。盡俘其器甲。族屬黃華始平。迴鎮揚州。二十一年。省治杭州。從與俱。其年鎮湖州。路南潯。明年。調嘉興。路海鹽。未幾復還南潯。又還鎮壽春。

二十四年。詔領軍討交趾。至黃州罷兵。二十六年。鍾世明叛江西。吳太仲叛興國縣。搏奇蹂盧。率以底事。上功司勳。輒卑退不欲言。三十年。移鎮和州。大德四年七月某日。卽世。年五十有七。娶楊氏。先卒。子男若干人。長繼武。襲其爵。葬于宣武侯之墓左。曾祖某。祖某。妣某氏。予嘗聞古名將。垂老吶吶。若不能言。祕畫勇略。壯歲所施。無留蘊。閱成敗得失已盡。醇酒鍾鼓。夫豈託焉。以自完者與。烏江馬君某言。吳侯知儒書。後悟浮屠氏禪學。充然若有得。其女弟亦能爲禪人。尚語。是皆世所鮮有者。銘曰。

維昔淮甸。勁雄莫俾。一夫當百。鉞戈怒投。裹彼乾餼。聿嚴盛秋。養安懷愜。苞桑靡謀。天錫大帝。神武與邦。捨其喉襟。投鞭浮江。俘鷲擒驍。百城春撞。視彼彈丸。後夫卒降。桓桓吳侯。效命奉職。以其素能。昭代著績。寰寰先登。颯掠電激。或乘其巖。或臨其跡。瞻彼霍山。雲流無蹤。昔困于兵。今黍芄芄。繫帝之功。維民之逢。侯之幽宮。松柏茂直。告而孫子。靡懈靡忒。法其退謙。恬靜以默。我思于淮。作銘示刻。

同知樂平州事許世茂墓誌銘

端平三年。蜀破。衣冠大姓。順流下東南。至江陵。十不存一二。皆舟觸巖。瞬息以死。淳祐三年。蜀益盛。避兵來南。其物故與端平無異。宋主憫其流離。悉擢列在位。大者輔政機。備獻納。外爲閫臣。郡將。經術史學。四方取以爲宗。則宋旣亡。故國世臣。益困辱不自振。淪胥泥塗。非獨蜀士然也。大德七年。梅備史屬選。與虞忠肅公孫集交。許君松以湖廣掾上計京師。詢其官簿。則顯謨閣學士給事中少保諱奕之曾孫。中奉大夫知紹熙府監介節諱彪祖之孫。奉議郎通判涪州諱長源之子。君字世茂。懿範世則。珠貫而櫛比。語

四蜀事。歷歷在指掌。清言雅儀。筆札擅簡古。卑讓駟與後。進較酒至醉。愈恭不復作世俗語。遂締與之交。至大元年。授潭州榷茶副使。再見之。貌益溫。論事盡繩墨。智圓氣完。欲以政理自表見。故其爲茶官。也不務苛刻。而課有贏羨。仁宗皇帝立科舉。以君考鄉試。自喜曰。吾嘗貢于鄉。黜浮培實。宜以稱明詔。是歲君所貢士入南省。號爲得人。延祐五年。授徽州路婺源州判官。復與語。輒愀然曰。吾家由開慶初。辭簡池。寓南康墳墓井邑。生別踰五十年。貧不能忘祿。龔峴州縣。弗得以文墨顯。吾何爲哉。其治婺源。益自振剔。絕蔓探疑。明以近民。而盜跡不敢入境。至治二年。見其神益清。貌益癯。舉酒釀酌。卻雋永。猶喜議當世事。栢與翰林直學士曹君元用子貞。共署薦爲湖廣提舉儒學。思以佚其老。集賢直學士鄧君文原善之。亦曰。是舉誠不忝。吾爲江東分部使者。嘗舉其政事文學矣。十一月。授承直郎饒州路同知樂平州事。歲終得上氣疾。正月甲午。終于邸舍。年七十有二。曾祖妣某氏。祖妣某氏。妣某氏。妻趙氏。再娶陳氏。子男若干人。女若干人。孫男若干人。始君居南康。閉門授徒。以奉母。右丞燕公公楠開營田司。知其賢。取以爲佐。後遷行大司農。益任之。掾湖廣省六七年。能以儒術輔法令。事明理融。無底滯固陋。一時吏師尊禮之。君始生。踰百日。晝夜啼不止。有僧祝其頂曰。汝爲許氏子。啼何爲耶。啼乃止。未幾。涪州下世。年八歲。隨舅氏茶馬趙君寓江陵。里有災。能取涪州神主奉以逃。稍長。益自奮勵。諸老咸器偉。故晚歲宦業。雖不大顯。而行事有足稱者。其喪歸。以某月某日葬于某原。子叶。踵門以廣信。劉君光事狀泣曰。願請銘。桷泣相向不復辭。嘉定更元。韓侂胄誅。解僞學禁。先少師正獻公。曾大父樞密越公。相繼入著作庭。給事中少保許公。巍科。

首班著善類肅穆。天下傾動。未幾少保論外戚不合。去今幾百二十年。閱昔時題名。求其嗣續。率皆澌盡。銷鑠而杳。與世茂俱爲曾孫。相顧自保。灰編墜簡。證世德之舊。於世茂實有望。今死矣。雖欲勿哀。其可乎。銘曰。

蜀由秦開。踰千載底寧。英光蜚聲。山川耀靈。漢魏啟伐。不假以兵。唐宋踵規。開門晝迎。錦楹繡牆。夸浮日矜。帝鑒地圖。百神震驚。氈車轟轟。金戈晶熒。自西徂東。舳艫貫繩。或沈于淵。或疫以乘。蹇蹇許公。疑丞弗登。是生介節。嬰彼孤城。恂恂涪州。弱息慎承。流離拮据。守其書籙。儒以飭身。政以裕名。匪急於祿。抗宗希成。凡我士族。欒范是懲。東南之區。凜其春冰。我思許君。是用述銘。

任隱君墓誌銘

鄞甬東橫溪。多郡宗故家。桷之七世。祖祥符丞而下。娶婦皆楊氏。少保夫人曰申國。太保曰越國。魯國。太師曰齊國。幾三百年矣。楊袁爲中外表。歲時往還無虛日。而甬東任氏。與楊姻婭亦十餘傳。一日任氏子元善。介予表兄楊仁之。以其先君子之狀求銘。復錄其十九世祖唐建州司馬遠之葬記以示。其記曰。建州生佶。檢校尙書工部員外郎兼侍御史。是生崇。試循州司馬。循州生貞幹。元和十三年。補集賢殿供奉承旨。後爲越州都督府功曹參軍。以終。集賢生行規。大中時。以明經薦于鄉舉。上第。爲蘇州司兵參軍。吾里士族。莫先於樓。袁。楊。蔣。作郡志者。於任有缺。仕莫榮於集賢承旨。承旨。布衣爲者也。職驥逃校理。在元和時。任不輕畀。司兵。以明經登唐上第。尤偉著志。亦不紀考。孫吳有任光。任奕。皆鄞句章人。今其地爲鄞。

縣。則建州蓋二賢之裔。而先賢皆遺軼。比予補郡乘。亦缺然有愧矣。嘗考大中以後。鄆數爲盜侵掠。城燬蕩遷徙。錢氏以宗親。專節鎮。租稅刮剝。民不堪奉。昔時故族。躑躅銷鑠。於任氏槩可見。至宋受版圖。與文儒。鄆士在汴始盛。渡江以南。雲滃川湧。幾二百年。而不幸數十年。詩書廢墜。望塵執隸。欲爲任氏十九世之傳。不可得。噫。可勝歎哉。可勝道哉。任君名天祺。字君瑞。曾祖汝諒。祖用康。父逢龍。其居鄉善保衛。徵調數起。先事以備。縣胥不能高下。友其弟天麟。弟病酒死。曰。吾不可使弟無後。殯其喪。俟我死。必俱葬也。大德七年六月某日卒。年五十有八。未幾弟婦顧氏亦卒。以其遺言。大德十一年十二月丁酉。奉柩與弟及婦俱葬于吳公山之祖塋。妻屠氏四子。元善。可善。承弟後。達善。兼善。孫男四。立道。弘道。鳴道。原道。孫女三。立道。楊氏壻也。銘曰。

世胄日顯。任譜完堂。堂文藝志錄傳。昔通今晦。理則然。鄉井急誼。手可捐。金錢東聳。下泓泉。蹇極遇順。盈百川。我銘考官。以昭先歷。十九世緒。益延焯哉。任恤德靡愆。率而雲仍。亘千年。

史景賢墓誌銘

君諱韋卿。字景賢。鄆史氏。故國世臣。太師丞相保寧軍節度使。越忠定王諱浩爲會祖。妣貝氏。魏越國夫人。太師中書令保寧昭信軍節度使。衛忠獻王諱彌遠爲祖。妣潘氏。齊魯國夫人。觀文殿學士正奉大夫。奉化郡公諱宇之爲考。妣趙氏。高平郡主。君幼成合矩度。進退持奉。侍立占對。識者知眞王孫。筆墨書史。楚楚自將。皆有法。郡公目送深念之。稍長。鉛采自陶。寫蒼松斷崖。昂然有遺世意。宮商敷宣。綵鸞詠而鳳

幽鳴也。退靜韜匿。冥會于千載之上。察其念。良是矣。郡公職二品。君當以京官入仕。生晚。祿弗及。至治三年秋八月。得上氣疾。卻藥賦詩。出別語於宗親。桷時官京師。呼桷子瓘立牀下曰。爲吾語而翁。求銘以昭吾志焉。越翌日辛酉果卒。嗚呼。年甫四十有八。章綬積襲。隱顯有定數。至於年亦不得永。是可哀也已。維忠定王。桷外高祖。幼習外家獻文。世德相業。焯在宋史。不敢論。獨敘三世壽考。以增君之悲。維忠定以三公居東湖三十年。陪祠慶壽。秀骨山立。多士秉笏交語曰。史太師真壽相。年八十有九。卽世。忠獻獨相二宗。二十有七年。總核庶政。燭照藪納罔有缺。年七十以終。郡公恂退若癯儒。鴈眉素毫。冰玉照焜鄉黨。年七十有九乃終。壽種彰灼。若是。君才不得一見施設。年又不能以紹傳。是大可哀也已。子一性。孫女二。將以某年某月葬鄞縣陽堂鄉金輿之原。銘曰。

寥寥東陵瓜圃熟。沈冥里閭企高躅。達人知命化不惡。手持參差入雲谷。周公魯公儼初服。奉養以占剝。斯復學詩習禮在。嗣續我銘孔悲辭匪瀆。佳城鬱蒼覘宰木。

袁州知事孔君墓誌銘

大德初元。孔君昭孫明遠甫爲慶元儒學正。于時禮部尙書王先生應麟。師表後進。門無雜賓。明遠以通家子。執疑證訛。桷每連席請益。時則有教授某。恣睢自負。語侵先生。乃憤然曰。吾不能與之共處。疏其謬誕十數事。鳴于憲府。人益奇其伉直。有先中丞遺風。是後爲蘄陽教授。蘄陽舊爲邊障地。君能化其俗。使稍就學。久之不變爲儒士。皇慶元年。授慈溪縣主簿。郡人咸曰。是斥故教授者。飭躬以廉。民莫敢病。未幾。

江浙省取爲掾。會歲祲。計富人籍田出粟以賑。吏不能舞文。粟悉入市。其直輒減。宰輔奇之。延祐口年。授從仕郎袁州知事。秩滿。泰定元年。以疾卒。時年六十有二。君實孔子五十二世孫。中丞爲大宗。傳四十有七。世中奉公。傳與其從子玠。南徙三衢。賜廟。譜牒章灼。而君之考諱某。咸淳間爲名太守。後僉書樞密院事。職進資政殿大學士。而大父某亦贈太子少師。諡文介。曾大父諱某。贈某官。妣某氏。某氏。某氏。俱贈郡夫人。噫。士常患爲世家。紹宗趾嫩。懼難以繼。仕顯矣。德不稱。無取也。言足以斥姦。發揚剛毅。是則於孔君見之。仕雖不大振。於孔君何憾焉。予嘗與君由義烏同邸宿。至整學。旬日危坐。論古今。各欲以名節相勉。而懷奇抱介。予輒讓不敢。今歸老田里。期爲全人。思一見明遠不可得。至是淇來請銘。安得勿哭也已。娶王氏。前進士集之女。男六。淇。淮。繼兄。後海。蚤世。涓。繼弟。後建德儒學正。瀛。慶元昌國州儒學正。澣。早夭。女二。適山陰王塘。富春張順可。某年某月。葬葉水浮河原。銘曰。金剛而冰清。行之成也。白兮不緇。德之貞也。憤世嫉阿。全粹精也。謝彼威施。實蜻蛉也。銘以揭之。歸藏永寧也。

僉事范君墓誌銘

大德六年。范君子誠爲平江路經歷。于時桷將之京師。道吳。其郡大夫疑忌事多不決。范君抱牘堂上。定可否。大夫領頷。不復有異議。人皆曰是真贊畫才。嗣後爲掾中書。仁宗皇帝在東宮。興崇禮文。廣廟祭。凡視執政者。率增贊書。桷時日具紙墨。君排剔研討。使各中繩式。莫有訾議。爾厭繁劇。告外。補湖州推官。

又爲黃巖州州與鄞相犬牙治跡賢否嘗耳接巷議州民來鄞必曰吾州黃氏子號豪民范侯能挫抑之帖首受罪後予直集賢黃巖之儒生暨商于城垞者咸告曰黃生易黃冠訴范侯以不直遂議于大學士郭公訖不受其說精神籠絡貫穿于儒術法律將大展其用而其子景文墮門泣以告曰先君之不祿在泰定二年閏月某日得年七十道遠不克歸葬以是歲二月某日與大父奉議君俱葬于平江路長洲縣武丘鄉白蓮橋之北原知先君莫如子敢以銘請謹按君諱忠其先京兆藍田人後籍真定今三世矣其爲仕首受史丞相之孫耀辟爲浙東宣慰府掾改受蘭溪主簿再辟江浙行省掾乃授平江路經歷又授揚州路經歷不赴改辟都省掾授湖州路推官以選能爲海道府千戶分治四明知台州黃巖州英宗皇帝詔風憲舉守令再知徽州婺源改同知福建轉運鹽司事泰定元年擢僉江南浙西道肅政廉訪司事其簿蘭溪嘗攝尉事捕造僞楮當受賞君謝不取在湖州有訟弟死非命且疑弟婦受賂焚其尸君錄囚考弟實以鬪死婦始得脫湖多淫祠毀三百六十以治官舍分漕四明首拓廳事嚴竦治具新天妃宮以肅祠使其治黃巖黃氏事最著正彝倫絕攘奪尸祝口誦宜著于郡乘婺源俗尙競渡易其舟爲浮梁民不病涉在閩中鹽足於民而私貿者悉絕考其所居官興建鋤擊爲己任絕功利守名實爲君素志迄不展大用壽與祿不失其願亦可無憾矣嘗鑄禮殿祭器書二千卷歸于鄉學集賢王公仲常爲文以美篤于慈孝頒宗錄孤故贈禮部郎中白公某壯歲深奇之妻以女君感知己凡所爲樂府稗刻以傳曾祖昂霄金大安元年進士官正議大夫同知靜難軍節度使兼邠州觀察使祖元泰元授從仕郎同知解州事

父天祐汀州路經歷贈奉議大夫真定路趙州知州驍騎尉元氏縣子景文由臨安主簿辟江浙行省掾敏修善吏事其進將未艾孫二公琇公琰孫女五乃爲銘曰

吏詬于儒以儒爲拘儒以病吏其刻莫渝據會統宗孰承其傳溫溫范侯趾燉紹先化其奇觚不急以干削豪翦強欲援以手謂不大逢亦旣祿壽世方尙名我獨倚之彼喜以功縮武避之武丘之原松柏峙植魂無不之子孫承式

鄭照磨墓誌銘

鄭威敏公驥以靖康虜難死同州紹興錄孤衷忠賜廟感節至于其孫建德登進士第延賞守祠世嗣不絕五世孫諱元貞實奉祠事生孫曰端是生汝賢爲江西安撫司準遣生檜爲都酒庫官君之父也君諱文瑞字子祥生而骨相殊特府君深奇之稍長從鄉先生課程文有能聲科舉旣廢居里閭以孝謹稱至元間下令舉儒吏實預首選試郡功曹移典玉山郡侯復取自近省授監平江路倉轉海道萬戶案牘官再爲海鹽州案牘轉行省鈔庫副使平江庾氏歲入浩夥不得脫君獨以治辦稱海鹽多豪民殺人率遣奴償死君能直之行省積敝楮三年不毀君上言申其數而歲除之後取以爲法泰定元年勅授將仕郎浙東道宣慰司照磨兼承發架閣予見君於京師言議縝密剴割苛宄中繁節賢官帥司下帷沈思吏跡不入戶勾稽研覈充然益有餘地古之善居官者必自持家始自衣冠丘墟不復給足荷戈負耒何可勝道念昔信實要衝君獨善理其身掇拾化治任能竭力相其天時權其贏奇卒昌於官以發其素蘊是殆

於君見之。抑又聞之。流光演休。首於死節。宋社云亡。忠義之錄。一二僅見。則威敏之澤。雖十世未艾。君續其承。猗與盛哉。其卒在泰定三年九月某日。年六十有三。某月某日。葬某縣某鄉。子男四。謙亨。復亨。鼎亨。泰亨。女三。嫁黃中正。孫良玘。葉原道。皆仕族。孫男七。孫女七。娶姚氏。曾祖妣蘧氏。祖妣劉氏。妣謝氏。謙亨奉柩將歸里。踵門泣以告曰。先生故大門。知官譜唯詳。而吾里獲銘者數家。矧先子世系。若是敢以請。銘曰。志專豐崇。足昌其躬。家傳於忠。蹇事于公。美玉襲之。良馬繫之。不泄不辱。云紹以續。作之怵怵。承之競競。而子而孫。視我斯銘。

文清薛處士墓誌銘

孔子敍逸民。謂其求志達道。超然於塵垢之外。心若槁木。形若蟬蛻。動莫有跡。行莫所名。其混世也。物莫與俱。冥神內觀。返真潛虛。若是者。其近之矣。故昔之善晦匿者。草衣菲食。不導引以壽。養其天年。恣縱泉石。歷探遠挹。興至而若遺。擇幽絜以養其雅操。求於世。吾不得而見之矣。今得一人焉。曰處士薛君勉。薛君。信州貴溪故儒家。自其曾大父子。徹以儒科。縣南丹。大父琢。父士亨。繼業進士。君益以儒自勵。居鄉黨。教授。名不斲彰。冲然有容。守約自裕。游湖湘。極交廣。返築室于宜陽。納幽據勝。爲堂曰寶善。以示子孫。泰定三年四月某日卒。年六十有八。族黨姻戚。咸會哭曰。先生儒以紹傳。茲其爲文也宜矣。固窮而無求。貽書以遺後。其得不謂之清乎。遂私諡之曰文清。子二。玄義。玄儀。玄義與余爲方外交。在崇真宮。數評議吾

徒所當爲事。詞章清峭。翰墨簡潔。每視之。嘗以爲不可及。君既死。求銘於余。實不敢辭。在易蠱之上九。不事王侯。高尚其志。而初爻則曰。有子考無咎。嗟夫。離世絕俗。念不存於家。非子承意。曷克臻濟。是肥遯者。猶相須以成也。妣王氏。配孔氏。孫男二女一。以某月某日葬。銘曰。

冥飛維鴻。莫窮去還。飄搖長裾。游於海寰。沈匿不羈。謝彼世艱。貞簡峻清。玉雪者顏。支離似困。爰養其遯。先賢高風。承耳接論。葆真藏名。永裕嘉問。振振有子。益昌者名。三光盪摩。服其粹精。有大之松。清風泠泠。非培曷成。非繼孰承。

海鹽州儒學教授袁府君墓表

維袁氏四明大族。由處州太守諱穀。試開封府第一。登嘉祐四年進士第。佐蘇文忠守杭。文忠爲同年生。後贈光祿大夫。生倉部郎中諱灼。得罪政和以歸。生贈朝奉諱炯。朝奉生通議大夫諱文。通議生龍圖閣學士贈少師諱燮。燮以禮部侍郎專史事。謚正獻。天下稱爲絜齋先生。桷七世祖諱穀。試開封。以中書守當官。遷祥符縣丞。生曾孫爲少傅同知樞密院事。諱詔。贈太師越國公。受學正獻公。於宗譜爲族子。相踵登淳熙進士第。同入祕書省爲史官。先後爲侍從。縉紳榮之。正獻生子四人。俱至名卿。尙書東宮官。而第三子最清顯。嘉定七年進士第一。再世國子祭酒。仕至兵部尙書給事中。實錄史院修撰。諱甫。贈少傅。謚正肅。天下稱爲蒙齋先生。正肅次子諱篔。通判潭州。是生君。諱衷。字德平。以安定長授海鹽州儒學教授。未拜。延祐七年六月二十日卒。年六十。有一嗚呼。甲族鼎貴。莫盛吾里。蔓棟接耀。郡守丞監。官議婚對。未

肯齒擬華腴爭高姿度悅澤可愛念遇大變故困辱不自完業無依歸買買以死者多矣方至元十五六年間故家猶亡恙海鹽時年二十桷年十四五私相議曰官族久當圯宜斬爲傳遠計未幾正獻宅火留城南遂各盡晝夜澹源鈎思探索幽隱以黜陳辭爲己任考閩蜀東浙永嘉湖南江西之儒先合其異同不在於貴耳雜書襲訛輯言行者尊之吾與子所當辨更二十年各宦游四方君以憂寤困躓酒酣語豪卒不少貶折詩筆益溫雅簡絮察其學猶以昔所言自任桷由集賢罷歸往拜焉病且瘠不能起忽手書曰夜夢游南嶽署已判官遂釋之曰南正火也火爲離爲文明宜司以瑞太平今天子興文祿弗及其在乎子孫未旬日下世夫子作春秋譏世卿史非世官不能兩家子孫凡五爲史官獨君不及用誠可憾曾祖妣邊氏秦國夫人祖妣趙氏衛國夫人妣趙氏封孺人子四曰霆曰杲曰銳曰齋孫一人有文集若干卷葬在正肅塋十步邇乃表于墓曰桷備史屬號最久見秉筆者罔再傳獨東平王公其子文且賢纂修有能名嗚呼吾宗免矣夫君不得預爲可吁厥子若孫永紹圖至治二年歲次壬戌族姪具官桷表

真定安敬仲墓表

嗚呼金蹂宋躡南兩帝竝立廢道德性命之說以辯博長雄爲詞章發揚稱述率皆誕漫叢雜理偏而氣豪南北崇尚幾何所分別當是時伊洛之學傳南劍至乾道淳熙士知尊其說闡明之朱文公統宗據會織鉅畢備正學始崇又未幾僞學造謗咸諱其說以售仕于時金將亡各流離自保烏覩所謂經說哉有明其說者獨江漢趙氏私相筆錄尊聞傳信稍自異流俗皇元平江南其書裊載以來保定劉先生因篤

志獨行。取文公書會粹而甄別之。其文精而深。其識專以正。蓋隆平之興。使夫道德同而風俗一。承熄續絕。不在於目接耳受而有嗣也。劉既死。得其傳者曰安君焉。君諱熙。字敬仲。其學汪洋靜邃。謂文以載道。辭不勝。不足以言理。故其言修以立。於詩章幽而不傷。慕貞絜之實。將以自任其道者也。道散於異端。九流證拾於墜簡。傳者益遠。而書幸具在。不知而作者。則索於句讀之末。旨意斷絕。踵謬而莫悟。君設對問以辨。後作者悔而焚其書。左氏浮誕。不合經者悉去之。續皇極經世書。由元豐至至大三年。考家禮爲祠堂。以奉四世。邑人化之。教人也持敬爲本。解經必毫縷以析。果知之。必驗其所行。弟子相從者常百餘人。出入閭巷。佩矩帶規。知其爲君之弟子。其於劉先生也。未嘗一見之。蓋篤信其書。默求以通焉者也。劉亦知君足以傳道。卒不得見焉。君深悲之。而於學有似君無憾矣。君之先太原離石人。五世祖玠。仕於金。會祖昇。不仕。祖滔。以經童登第。金將亡。徙真定。因居焉。戊戌歲。詞賦入等。占儒籍。考松江東。宣慰司照磨。妣劉氏。君少敏悟。諸父咸器之。素多疾。嘗避隱封龍山。然卒不得年。至大四年五月某日卒。年四十有二。娶張氏。焦氏。子二。壘。垣。女一。嫁保定等路鷹坊總管王冲。是歲葬藁城縣安仁鄉先塋之側。其卒也。翰林學士王公思廉。以書唁其父曰。自敬仲死。詎安氏不幸。士林不幸矣。有遺文若干卷。既葬之十三年。門人蘇天爵述其事狀。踵門曰。默齋先生。天爵從學實有年。先生之德之行。願表于墓原。使有考。桷作而言曰。真文忠公德秀。與朱文公同里。生不及事焉。文公之學。真實紹之。侑食于廟于祠。無異辭。集賢劉公生愈後。闡揚合一。劉公功與真公竝。安君不得見劉公。而道實有傳。盛矣哉。春陵之學。四方爲有準矣。某年某月。

某日具官袁桷表。

史猷父葬記

代其子作

大德丙午九月朔我先君子壽春推官卒于寢年七十有三越十月丙午葬其地邇高祖越忠定王墓次百步許先夫人郭氏卒葬十五年乃合窆焉嗚呼先君子諱徽孫字猷父少孤祖母嚴氏躬教督具諷先訓感悟于時史氏極貴盛壽春矍然整修奮棄子弟玩習搜紹淵懿族祖文靖公見之曰兒當以文名吾門稍長試吏爲諸暨主簿從政精覈邑長缺使者俾治幾一歲入辟淮東治田事調揚州司理參軍帥大器重悉以事付甫授壽春帥益取自佐循承直郎而先君子不復仕三十有三年矣有詩文若干卷晚讀陶靖節詩語近意遠視世德脗合深自慕儼平居無愠忤色筆墨清藝觴至輒就放邵子觀物爲詩數十篇久更困約益以理自得清日危坐道舊事緩語不絕口鄉黨賴焉嗚呼公巨等五男子爲從伯父從叔父後者曰公玉公蕃次公晝公巨女三已嫁仕族浙西提點刑獄贈少師諱彌正爲曾祖紹興監酒贈朝奉大夫諱實之爲祖朝請大夫通判處州諱顯卿爲父將葬謹書納諸壙

張府君墓田記

平章留守亞安公介其掾韓叔亨致命於袁桷曰吾外大父張府君世燕大姓貞祐來兵革相尋獨府君逃難脫死每言避兵本末輒吁歎涕泗且曰吾譜牒亡缺使果得仕吾安能爲祖父榮顯耶由是益治生自裕強之仕弗願也至元十五年三月某日卒年六十有七外大母劉氏次黃氏俱無子一女劉出也嫁

我先公中奉大夫湖南宣慰使。後以卹典。贈金紫光祿大夫大司徒梁國公。而吾母亦得封爲梁國太夫人。府君之塋。在大興路大興縣宜泉里。歲時率外孫奠薦于塋下。封植崇謹。顧瞻咨嗟。推其所自出。其接于見聞者。誠莫有怠也。更數十年。則曰禮有隆殺焉。推服盡之義。至於異姓。則必曰先王制禮不可過也。夫禮由情生。使張氏有後焉。誠不敢越。吾懼其塋域之蕪沒。詔于曾元。將有以謹諸。爲我記之。桷聞諸春秋。會盟稱辭。甥舅之國。雖數十世。猶徼福於先君。敦敍之義。蓋可考也。掩骼埋胔。先王之令典。留守公之用心。合於禮者之爲也。凱風寒泉。藹然見於悽愴。情之至也。然則凡爲子孫者。寧不守其家訓也哉。府君諱祥。字瑞之。壻梁公諱某外孫。長卽榮祿大夫平章政事。大都留守。領少府監。行工部事。佩金虎符。武衛親軍都指揮使。兼大都屯田事。次某承務郎。太府監左藏庫使。次某奉議大夫太僕寺丞。外曾孫凡若干人。延祐四年九月某日。具官桷記。

田氏先塋誌

太僕田茂實君秀。與桷交。京師相好也。大德乙巳三月某日。其先君子諱某。年六十有五。卒于河南。君秀墨色蓬首。哀不絕道。兼晝夜行。歸治其喪。將窆于大塋。卜以不吉告。越二年。始得吉于邙山之白李莊。乃徙武略君與夫人齊氏合葬。以諱某君祔。至大戊申。君秀奉家譜言曰。嗚呼。先君子德豐而養薄。孤之罪也。田氏世居豐州。有試金武舉科爲環州司候者。諱青。金徙汴。拜武略將軍總戎千夫。屯鄧州。鄧歸有元。改爲襄樊屯田官。豐州慕夷徙。始占籍于洛陽。武略。吾大父也。先君子嘗言。金將亡。城郭蟻潰。四出馬塵。

南驅躡藉爭死。枯骼野燐。千里一色。豐州爲路衝。荒墟收礫。白日無人行聲。自吾少年聞祖父言。每震掉不自已。今汝生盛明時。重和累休。振纓清朝。吾老於斯土。藝于田。漁于河。涵煦濡濟。食安闕華。沒齒誠樂也。仕何慕焉。茂實泣受其首而書之。敢以爲邨山之瑩誌。請栢曰。噫。夫邨山古之幽宅也。穹隆袤廣。可以數度。自秦漢而降。錮其封崇。極于夸貴。俠侈之士。不知其幾。後今變更。高者爲雲煙。下者爲水泉。而慎終送死。日相尋於此山。愈完而愈新者。何也。夫貴以日計。德以世計。德足而貴不至者。命也。恃貴而忘德。貴將恥之。今君秀官于朝。將貴矣。念先君子之言。警其宴安。彌以自勵。吾知田氏之墓。滄然而豐茸。必戒必護。衍其子孫。益守孝謹。雖千百年無變。而始田氏之譜者。由武略。愈遠而愈可考者。由太僕。其尙勉之哉。母夫人高氏。慈儉有家則。君秀今爲奉直大夫太僕院判第二。德峻世英。葬以某月某日。袁栢誌。

高夫人葬記

代作

嗚呼。我先考至元甲申歲七月十有三日不豫。昉時年二十有一。平居嘗言吾宗世居遼陽。始祖當金時。以征遼功。封太師。有子十人。皆拜節度使。金亡。太師子悉散軼。獨曾祖崑嵐州節度。紹其宗。是生大父諱植。爲洛州防禦使。妣大氏夫人。洛州生近侍局副使諱世榮。副使卒。吾時年八歲。妣王氏夫人。寓殯于陝。因家焉。夫人鞠撫之。迄見其成人。初娶郭氏。前元帥左監軍巨濟之女。後來大名。經歷孫用之。無子。察吾氣宇非凡。近遂以汝母歸于我。因定居大名。而自洛州而下。藁殯于陝者。皆葬于元城縣之令公鄉焉。先考諱昂。字冲霄。由轉運幕職。拜朝城武陟縣尉。能以慈惠撫其民。盜不敢犯。後謝病退居。樹德自祕。重享

年五十有九以終。防初掾集賢。由院上中書。自中書累遷爲左司郎中。出爲潭州路總管。太夫人視聽明徹。總覈靡密。防盡服王事。一不使亂其志意。未幾入爲中政院同知。拜中書省參知政事。尙書省立後。除江浙省參知政事。至大四年。詔官二品。得贈二代。由是副使得追贈嘉議大夫大名路總管兼府尹上輕車都尉王夫人。追封渤海郡夫人。先考贈中奉大夫參知政事護軍渤海郡公夫人封渤海郡太夫人。皇慶癸丑。防陞資善大夫。爲江浙行中書省左丞。太夫人年益高。屢疏終養。延祐元年春。復召爲中書省參知政事。奉夫人將北歸。使者屢趣就道。又未幾改拜集賢學士。商議中書省事。乃不敢辭。遂侍夫人來京師。是歲十月十日。以疾終于正寢。享年七十有九。嗚呼。防不孝。先公亡恙時。不能以祿爲一日之養。幸得奉先夫人以自慰。垂三十年。不自殞滅。禍罹慈親。攀號訴慕。實無所容罪。將以是年十有一月某日葬于先塋。日薄未得謁銘于當代。謹志其梗概。納諸壙。男一。防。女五人。長適梁從晦。大名等處管民提舉。次適李允中。萬盈屯丞。二人蚤卒。次適李好義。承務郎齊河縣尹。孫男三人。筠。孫。壽。孫。和尚。孫女一人。孤子防泣血謹誌。

趙令人葬記

代作

嗚呼。宰孫大父爲郎時。先子樂清尹。始試吏部。靜秀專恪。鄞史氏號相家。刑部再世國子生。執禮秉度。不以官簿矜許。先夫人侍永陽王。族屬崇近。莫敢議昏對。永陽尊刑部。愛樂清。遂以歸。乃受封令人而始嬪焉。夫人姓趙氏。諱孟柔。曾祖師意。追爵於吳。諡宜獻。祖希邇。掌宗正。食于會稽。夫人沖默謹視聽。儀範不

出屏閣。相先子以和。撫子若女無二意。距先子葬始一紀。夫人以歿。歿時年五十有四。嗚呼。養不能盡。哀未知稱。乃大德丙午。合封于樂清之兆。而先夫人之亡。適終喪矣。痛徹于天。曩事徵德。將不懈有俟。永陽諱與。夫人爲長女。刑部諱能之。夫人爲冢婦。先子諱普卿。宰孫爲孤子。女一。嫁趙孟賈。是歲十月甲辰。葬。謹濡血爲之記。

清容居士集卷第三十一

墓誌銘 塔銘附

周夫人墓誌銘

夫人諱天福。朝議大夫知瑞州周公諱應合之女。朝議大夫直寶章閣廣東經略安撫知廣州冷公諱應激之婦。今湘陰尹名頤孫之配。世爲龍興武寧人。瑞州以學行表後進。論議惜許可。湘陰拔童子科。整敏善自晦。亟愛重之。故俾夫人以歸。兩家爲儒宗。婦壻各得所擇。衆咸曰：在是。夫人幼靜慧。受女史。工正書。二弟始就學。日諷誦。感發相勵。事尊順謹。媿德儷義。能使外有不知。絜豆籩。治昭穆。靡密斟度。恩意各盡。夫宗宜焉。二子曰有泰。有益。保抱具訓。輒置筆札。毋誑戲。稍長。約繩墨。躬詰難。嘗言：吾誘弟以婉。督汝以嚴。皆一轍也。善宜亟稱。過不可得聞。書種寧有斷乎。年四十有九。以卒。是歲大德癸卯。葬仁義鄉下畚里。女六。長許嫁周志行。孫男三。女二。仲弟分宜。承天鳳。來京師。桷與之游。議門戶與植。婦道允賴。數稱夫人之賢。過時而彌哀。於是有泰實來致湘陰之命。銘曰：

有崇義閭。維周之敷。展世秉文。耳受口濡。執彼閭儀。來彝來祗。宗承其和。家安其慈。誦聲在戶。嘉醕在廡。叶于夫君。婉德以輔。雙桐高岡。附萼煌煌。擢榮舒英。穀旦用光。列彼寒泉。聿環墓田。昭銘新宮。實曼厥延。

方夫人墓誌銘

湖廣儒學副提舉。上饒劉君安德恭甫之夫人。方氏。大德庚子五月己未卒。卜祔先墓不吉。乃假葬于舍東。越八年。相中堂山兆。以吉告。於是其子光以事狀來京師。謁陳郡袁桷銘。夫人世居饒之德興。幼特靜好。其父隱君。常抱膝上祝曰。吾家世儒林。當爲汝慎擇婚對。方是時。上饒劉君某。以太學名輩。待次寧國教授。歸授徒山中。饒信地接武。習進士業者。率相戒師劉君。始出鄉。隱君慨曰。捨劉氏子奚適。卽德恭甫也。未幾寧國死。德恭甫刻意振擢。不以貧窶自憊。隱君念夫人憫德恭不自置。察夫人意色無吝。卒俾以歸德恭甫。壯歲力問學。預計儲。生理靡密。一不問。夫人銖黍化治。手劇而身理之者。寒暑曲備。方丙子兵變時。德恭甫傾家貲。以完護爲急。夫人力贊之。事定。勉夫以仕。且言曰。盍亦少慰吾父意。始伯姊嫁同里蔡氏。蔡姊家侈盛。脫簪珥以服。亟搖手弗受。自是終老無異飾。生男子曰升老。幼卒。德恭甫晚得光。時夫人躬訓育抱哺。慈嚴酌宜。迄見光克紹其父業焉。始光游京師。與余交相久。話言母儀。悲泣不已。余特以爲母子至情不足異。夫賢其媿。子孝其母。閭里知事者。率能是。及觀夫人之行。與光終身之哀。見焉。若將弗及。則帷閣衽席。色笑敦厚。制事以理。夫豈勉而然哉。噫。是宜銘。夫人諱柔。則曾祖璋。祖應奎。隱君諱逢吉。卒時年六十有三。子光。瓊州教授。今爲中書屬從事。孫男二。至大二年。將治葬。德恭甫亦卽世。於是。以某月某日。祔。銘曰。

詩始房中。維教之基。芣苢薄言。和平以孳。考視劉媛。溫恭具儀。膏沐以韜。絲枲是師。外防內完。拮据孔艱。孩無矯慈。諸御閒閒。匪異其誠。由衷允安。興言遺思。載汎載瀾。女史日微。德音莫跂。瞻彼墓田。有顙斯泚。

松岡豐融。不震不圯。廣揚嘉芬。式裕爾嗣。

盧母王夫人墓誌銘

盧氏河北望族。有諱仙者。家深州武強縣。金將亡。武強爲秦趙要衝。歲蹂兵不息。由是徙家睢州。兵浸南。家益蕩析。有子曰全。掠爲奴。于時全生子曰榮甫。十歲。審其父北行。斷髮仰誓。呼曰。兒不獲見父。寧卽死。行泣道中。呼其父姓名。道由真定。日號訴宛轉。事益著。里人憫之。問所掠主。無異辭。卒。義以歸。父子復居武強。稍長。學書算。入鄉校。試吏。爲縣從事。時錄事王君崇攝武強。審盧氏子孝感。且吏能。乃曰。吾女舍盧氏。曷取配。遂以歸。生子四。曰文。曰仁。叔曰廷信。季曰德。廷信生始三年。不幸盧君卒。夫人撫其四子。力治桑泉。甘苦淡。垣屋庫狹。內外整截。有限程。督訓導。過者無敢譁。事其舅姑。以壽終。至元十三年。詔考郡縣孝節。於是河北道提刑按察司審盧婦事。不誣。州達于禮部。復除其家。而廷信始仕江南。調泉州晉江尉。辟福建行省掾。又掾江西。敍遷爲鄞縣丞。復掾江浙。未幾。以才佐海道漕。府陳不便事。就領金符。爲溫台千戶。歲運粟。視往歲數三倍。而夫人皆見之。廷信爲鄞丞。余時里居。見其處事精覈。剔植蠹利。官長不能出私語。上府陳白。伉直無隱。嘗曰。吾盧氏世爲吏。刻峭文致。非以起宗。吾父有孝行。迄不得上壽。稍自飭勵。繫吾母之訓戒。子孫爲儒。冀吾母慰意焉。至大二年。夫人卒。年八十有六。祔葬于先塋。延祐二年。天子孝治天下。推實存歿。而廷信秩五品。得贈其考奉議大夫。真定路趙州知州驍騎衛尉柏鄉縣子。夫人亦追封柏鄉縣君。四年。遣其子某來京師。請銘。桷待罪史館。若盧氏事。誠宜書。今誌也。無溢辭。系以銘曰。

林林生民。男室女家。禮失俗淪。企而祿奢。維貞丈人。尙古不遐。卓彼孝童。木升斯華。承筐來嬪。絕其榮夸。四雛在戶。蓬首苦心。甕牖屹城。過者肅襟。宅里表植。柳槐森森。頰弁奮揚。滑甘具新。大耋莫嗟。淑德岑嶽。戒而孫子。服儒以嗣。教經展世。厥武踵起。有隆墓田。大賚告祉。式時芬苾。永保千祀。

侯母王夫人墓誌銘

世祖皇帝以仁立國。敦節申義。丕變醇厚。至元八年。時則有若太保劉文貞公。議事省中。增益今式。由是郡縣旌表。綽楔槐柳。光于往史。猗歟休哉。栢由集賢歸里居。錄事判官侯玉踵門來言曰。聞子嘗執筆太史。節婦孝子。歲終必登于史籍。玉也敢有言。玉故居濮州鄆城縣。其先女直人。曾祖敬嘗爲金殿前將軍。祖林。金人匠總管。父珪。仕皇元爲濮州儒學教授。濮州不幸年四十有一以卒。母王氏。生子女六人。惻然未勝喪。吾母之教四子也。皆身訓之。其鞠二女也。必教以纂組化治。嫁聚耕稼。能謹之以時。家貧無生產。而充然若有餘者。繫吾母之力也。玉兄弟既長。而吾母益能綜核靡密。不知有缺怠。故仕者得盡心於官政。而不仕者。孝謹稱里閭。玉之爲婺州永康縣巡檢時。至大三年也。母年七十有七以卒。至是婺居凡四十有餘年矣。後復爲婺之平準庫副使。婺之人知吾母行若是。縣儒士具實言於縣。縣下於鄉。加考察焉。由是以達于郡。郡復移於所居州。州明於禮部。然後悉如詔旨。旌于其鄉。敢以是有請。傳永遠。嗚呼。劉向作列女傳。當熙明之時。則肅雍平和。藹然有關雎士女之行。至於末季。則不幸不得全其生。讀其書。未嘗不興歎也。孝慈耕桑。帝堯表閭。夫人生承平。貧能以禮防。少老一節。實聖天子休養生息。漸仁秉德。有自

來矣。盛矣哉。能勿書乎。夫人名妙善。父某。妣某氏。長子伯巖。教授定海。慈溪兩縣。紅官。次某。不仕。幼卽玉也。女嫁某氏。銘曰。

勵其躬。訖于逢。慈儉勤。壽考終。表華楹。帝堯功。過者式。報嫩豐。

劉夫人墓誌銘

婦人之事舅姑。有從其令者矣。若近矣。莫知其心焉。有屈體承色。先事以備。逆志以求。其得謂之孝與。或曰。是知及之。考其中有疑焉。今之爲舅姑。嚴重則生畏。畏不能以治。玩弛則生怠。怠近於瀆。閨門之訓。厲以失之。而容忍者於教乎何有。在易之象曰。家人嗃嗃。婦子嘻嘻。吾於郝君。鹽使從之之。夫人有取焉。夫人姓劉氏。河間人。父諱鼎。母牛氏。夫人之姑李。嘗祝香以告曰。願吾子孫生。悉如劉婦。噫。此非出於令與知也。孝根於心。怨咎莫知。旻天中野。且悲且懼。若婦人貞靜。其誠懇顯著。一語以盡。茲其爲孝也大矣。夫人事夫之寡叔母。夫之孤姪。有恩愛。鹽使病未疾。歲久不愈。斥竭簪珥。佐醫藥。教子志善。能植立。兩見爲監察御史。至治二年某月某日卒。年七十有二。明年二月某日。祔葬于西山之祖墓。榜往銘。鹽使君矣。今御史復請銘夫人。諛盜辭事。史官所大戒。婦人事不出閫戶。以孝養爲飭躬本。考其姑嫜之言。是宜書銘曰。

有言閒閒。有儀珊瑚。視其寒溫。靡覲愠顏。從姑玄宅。弗愧以懔。繫爾後人。以永作則。

韓夫人墓誌銘

中原韓有二族。居會稽者爲安陽。居廣信者爲潁川。龍圖閣學士無咎公師表一世。其子仲止克紹家學。搢紳號二韓父子。而廣信別出一族。曰侍郎公祥。字履善。常卿公補。字復善。嘉熙中。士類稱爲二韓兄弟。梅族祖正肅公。持節江東。辟入幕府。在後省。復薦爲國子官。人皆曰正肅善選士。二韓公聞望駸駸。與潁川相竝盛矣哉。天運合一。衣冠家漸滅幾盡。江浙閩蜀。大略相近。余歸老里閭。有儒生踵門以告曰。徐氏子。祖母韓夫人。無爲大夫諱。之。女。大夫二韓公之親弟也。自夫人歸徐門。克持其家。事姑以孝著。待夫之弟妹。助裝以有室家。其相夫也。卻金以成美。夫官建寧。僚屬有不孝其母者。夫人引喻廣譬。能使其妻訖事姑以禮。訓子舉前史言行。時刻畫故事人物。以佐警戒。故其子孫俱能守家教。容又言曰。徐故廣信大家。刑部侍郎諱元杰。實容從曾祖。梅聞侍郎公侍講筵于時。史丞相圖起復。百僚皆進疏。理宗猶豫不決。侍郎獨微言曰。邊事漸寧。從戎以墨綬。失國體。丞相誠經濟。老其才以用。未晚也。丞相聞是語。憮然曰。嵩之不得起復矣。夫人之舅諱卿子。朝奉郎權知嘉興府事。其夫諱忠甫。終廣德建平尉。夫人之曾祖大寧。奉議郎知徽州婺源縣。妣諸葛氏。贈宜人。祖貴玉。贈朝請大夫。妣端明汪公達之孫女。男一。拱辰。將仕郎。信州路永豐縣主簿。先八年卒。女一。順正。適祝士貴。孫男五。宜。容。宅。安。寶。孫女四。卒以至治二年。享年八十。以泰定二年某月某日。葬于某山。容不遠千里來謁銘。秀整足以興植。使世家皆若是。其曷有憂乃爲銘曰。

亭亭兩家。尤爲舊門。服習懿德。克紹厥聞。幼工女史。粲其纂紉。亦游於藝。靡不究勤。母目旣盲。砥膜還明。

來嬾于徐。事姑益精。奉脆擇甘。順其性情。不侈其長。不夸其盈。訓子督孫。雅言諄諄。厖眉秀姿。儼兮淳真。宦族日圯。內教莫陳。吁嗟夫人。表茲堅珉。

定水源禪師塔銘

大雄氏以己說剖三宗。禪學汪洋廣博。言意承接。絕去文字。稍契入輒證爲知道。小智大黠。相煽以自高。律教廢棄。食不知耕。居不知工。恣情於無畔岸。而道益以昧。唯妙源師獨憂之。自嘉定十七年受具戒。卽游方。明本心。久而曰。不耐塵勞。心曷以制。願習賤事以調御。寓本州天寧寺。歲大饑。赤足踵門以化。後始歷清職。曰。吾得無媿名教矣。其師愚公持正議。不肯下宰相吳潛。潛怒。繫獄辱之。退居精舍。獨侍側。辨難。卒有疑義。愚公啓機以示。曰。汝今太平矣。愚公住徑山。卽俾首率僧衆。愚已老。學子林立。寮下析微統宗。愚喜力贊之。主平江薦嚴。內外事不一廢。舉鼓山國清。辭不就。主泉州水陸院。治若薦嚴。而俗士益信慕。愀然曰。吾寧久是。攜錫以歸。桷先曾大父太師樞密。越公功德院曰定水。伯父賓州。先府君處州。議曰。寺缺主者。善趨謁迎奉。吾兄弟不受。能以寂照解脫爲義。則庶幾冥福。源公行堅望高。使力請。必不讓。以素所往來者通意。乃欣然以來。桷時年十三。或問曰。吾儒性善。與佛所言同否。曰。同。感物而動。漢儒失之。由是有不同焉。後乃曰。儒釋二教。分別有異。在治人治心。治人在五常。治心在四大。脩五常治人之本。脩四大亂心之本。道微世衰。誠得一人焉。不可得。涕淚交下。謂桷曰。祿損則福益。盍慎諸。布衣鐵襪。終日尸坐。語徹機迅。奔電絕壑。不可制伏。稍斂戢。則瞬息在几席。禪人仰之。四方士尤宗之。精於詩。故宋名士喜之。

然不肯表襮。舊築居於越之雲頂。將終願。解定水以歸。且命無建塔。無火化。以任其壞。其徒不忍。卒埋是山。以至元十八年卒。壽七十有五。俗居象山縣。姓陳氏。爲僧五十有九年。銘曰。

道弊於文。卮言以宣。由簡速超。悟者日繁。空浮變騰。若火燎天。服奇食珍。謂合自然。師實已憂。榮戚靡覩。或逃于谷。或伏千莽。唯大雄是遵。唯古德是祖。機以峻傳。言以戒輔。通黜興廢。道曷敢替。幽扃潛珍。戶屢屬係。彼昧其承。卒踏以逝。昭銘授徒。勿圯勿翳。

延慶入法師塔銘

四明法智大師。以天台教旨。經緯導達。學者謂爲中興。南湖實講貫舊址。踵主其席。稍不厭衆議。嘗病交集。歷代承接。皆有足稱。道至師居南湖。千口無異辭。師名善入。傳姓世居定海。大蓬因法師見異之。淳祐十一年。與半山彬師俾受具戒。游諸方。辨解究詣。客東掖山。著教家四書。據會執約。不以文字溺泥。指畫勤懇。從者樂其易簡。初佛光法師居上竺。提其徒悉使出門下。于時有善良師。與師相講習。各植立不肯和附。師與良議曰。吾師大蓬兄能嗣之。願再拜以嗣。良後嗣圓覺頑空師。而師卒能昌大蓬。始典謁南湖。後首教坐主赭山。東臯世忠其說。以角立爲大病。支離爲末流。泛不盜詞。約不厓絕。禪人士子咸傾仰之。輿仆復侵。安衆靡懈。泉南僧素宗禪學。慕師德重。跣以請法智之學。行於東南六十餘州。至是入海嶠。人益奇之。至大年中。詔宣政行院。慎採選。勿阿意貪倖。集議者曰。南湖缺席。捨師孰能。遂以昔日所傳授者。深省密啟。空假破建。一性明靜。而互議交毀。訖忘于言。大蓬果有聞於世。崇本誓志。師於是有成焉。其凡

見於脩植。施於人事。今不復著。錫號惠觀弘教法師。而自號曰秋虛。延祐口年五月二十有六日示寂。爲僧六十三。年七十有八。化于城南。頂骨得舍利。葬法智祖庭。而以爪髮歸東。塚間之精舍。至元間。桷納交于東。皋。吶若不能言。聆其坐講。則汪洋罔詰。乘行潔清。癯容儼脩。粹然古德。有足興起。弟子大倫正道等。來乞銘。乃爲之銘曰。

四明之興。匪事於言。囊籥萬殊。貫于心源。如水必東。如矢必鵠。末世濫觴。語益以瀆。佔畢究鋪。千緒億條。炎炎詹詹。泛焉以寥。師慨有憂。約陳其辭。探微發機。會歸一岐。承宗紹傳。不希其逢。謝彼翕訛。矢心圖終。後歸南湖。振揭初說。曰吾師有傳。茲道不滅。弗蔓其根。弗瑕其璞。癯然蕭閒。廓以恬泊。世教日淪。臨雲徂高。著爾懿得。我銘用昭。

天童日禪師塔銘

紹定辛卯。蜀破。士大夫蔽江東下。成都大慈寺。主華嚴教。僧之秀朗。率棄舊業。以教外傳。游東南。若癡絕。冲。無準。範。導。達。後。進。表。表。名。世。者。皆。其。門。人。而。範。之。成。就。益。衆。天。童。師。其。一。也。師。諱。淨。日。號。東。巖。俗。居。南。康。之。都。昌。姓。廖。氏。幼。歲。喜。誦。佛。書。解。大。義。常。食。蔬。果。以。自。持。年。十。五。告。父。母。願。爲。浮。屠。氏。明。年。祝。髮。于。廬。山。香。林。訪。道。仰。山。石。霜。遂。入。浙。見。冲。師。於。靈。隱。越。二。夏。不。契。乃。登。徑。山。見。無。準。師。範。大。許。之。語。在。傳。道。錄。後。見。西。巖。惠。于。天。童。惠。無。準。師。大。弟。子。其。提。示。與。無。準。無。異。危。機。敏。鋒。迎。拒。莫。覩。風。止。水。息。渙。然。帖。順。遂。密。契。其。旨。卒。服。從。之。俾。守。藏。室。後。開。先。無。文。璨。屈。爲。第。一。璨。亦。僧。之。俊。傑。由。而。譽。聞。益。彰。宋。景。定。某。年。江。

東帥汪公立信慎許可。推以主圓通。咸淳某年。江東漕使錢眞孫。俾兼領東林。至元壬辰。主育王。三年歸隱雪竇。大德四年。集公議。主天童。師之行峻潔以完。語溫氣和。衆益得以親。納其徒。俾明徹復性。不侈于言。解其蔓惑。處於世。若無所施爲。遐邇嚮慕。傑閣銅象。無踵以至。而於天童功最著。久居東林。化俗警衆。民爭繪以祝。故其興天童。廬山之民。奉贄以助。尤夥。生宋嘉定十四年辛巳。終至大元年戊申。年八十有八。僧臘七十有一。將示寂。戒其徒。書韻語以示曰。天爲蓋兮地爲函。吾奚爲乎塔與庵。灰吾骨兮山阿。言已矢兮勿鑱。越二日。沐浴端坐而逝。其徒奉遺言以化。齒根不壞。遂斂藏于西巖之清風塢。噫。耆舊日淪。爭慙恣蕩。甚於世人。理不勝欲。靡然頽瀾。莫有障窒。觀師景行。實泚其頹。今弟子在浙東西。江東西。若干人。蠻溪嶺嶠。承師之教。亦不可勝紀。如砥等來請銘。銘曰。

七情盪摩。約性返源。喻以攝持。匪夸浮繁。末俗濫觴。競立險艱。眩一駭百。莫執其凡。性本湛虛。分別則二。不以解通。不以思擬。寂非有存。感乃隨義。達摩之功。空其所空。奚後人騁馳。庸失玄宗。空不假爲。茲惟用中。蜀學簡易。師承其風。開盲振瘖。發機以示。云彼摩尼。非淨非穢。往安自然。是謂止止。鮪背長身。從者如水。丹霞嵌空。匪耀凡目。曰茲山之頹。否極斯復。敬者效輸。罔不率服。山君來朝。雲醞霧轟。幻身旣空。勿錫勿甃。一氣孔周。窮彼變易。清風之塢。石列五色。恍焉如存。嗣者是式。

廣恩仁法師塔銘

師名可仁。貫天台縣寧海。姓胡氏。號木庵。幼歲游四明山。居資福寺。習天台鈔疏。于時我曾大父樞密越

公治齊國楊夫人喪。見師秀整儼恪。俾以從。服闋。吾必以汝祝髮。資楊夫人福。越公以右司郎中歸。召爲軍器少監。尹臨安樞密之夫人周國陳氏曰。師宜祝髮矣。嘉定十三年。設齋上竺。乃得度。于時月大師以講論訓諸徒。願侍席側。大師與越公厚善。謂師曰。今僧徒聰敏林立。稍使一人預人問事。得無害統體乎。由是在郡治。間歸胡巖。展治林嶂。一以任師。在館中。參政應公嚮猶未仕。深器之。曰。使師不爲僧。其問學當與士子竝。中書舍人陳公耆卿時爲臨安教授。與師同里。亦曰。應公言然。越公入政府。例得經院。乃相攸紫巖。繩約四履。峻危有階。引泉有梯。淬醢除險。帖石助高。審面曲直。周折獻秀。紹定肇工。淳祐告成。屈以主席。錫名曰廣恩崇福。伯祖吉州大父尙書咸諉以事。罔有弛缺。往侍諸父時。見師承接曲盡。而特氣凌鑠者。不敢出慢語。至於桷四世矣。噫。逮今五傳。有不善扶植者矣。而師亦四傳。守規蹈矩。僅一二數。兩家相視。岌乎可懼。桷由翰苑歸。登塔亭。謂塔主子鎮曰。往事將湮沒。師之行業。不可不紀。其徒曰。是在太史。師以至元十七年某日入寂。僧臘六十一。度弟子二十有口。人有詩集若干卷。大澤大雅。相繼主是寺。凡四十年。規約散弛。今有子堂。子鑑。子鎮。子金。子眞。猶能知師遺事。下是不復解。其寧有不哀也夫。銘曰。

維大雄氏。內寂外脩。不偏一能。用彰以周。在師敏通。卒異其儔。峩峩新宮。百礎承宇。以其彌縫。莫或敢侮。智周行圓。耆年以輔。成之匪難。承之孔難。大訓厥徒。黜慝砥頑。昭銘以儆。勿踰其閑。

延慶良法師塔銘

天台之學其說汪洋浩博旁訓廣詁多至萬言學者讀其書前迷後遺究厥本旨更席不能以終良法師始疑之謂由律以入則心以攝持由禪以入則心以解脫玄文妙旨約以據要事理昭晰如瘖獲吐如盲獲覩其爲書曰十門指要約說三卷指要餘論一卷教觀宏立門分戶列貫穿出入莫窮其塗師以諸部證其義例條焉不紊示焉指掌其爲書曰教觀撮要四卷三千別說則其師覺法師之言具在舉世尙同因省立異良非苟於言也師名善良字子直號月溪族姓朱氏定海縣人始祝髮淨居習律湖心游杭之大雄師頑空覺大師空問不二門所屬三諦三千其旨意與空合覺大師言辯簡峻師入其室嘗俾守講席後游淨慈訪禮禪師以古德語叩辯禪語瞬息眩晃意師泥名相爲可惑師徐曰三觀之旨不外乎是禮謝曰其歸振汝宗集慶寺成朝命選主席班從者亦皆精良晦法師主上竺任可否師預是選講大涅槃經聽者雲集師懸辯提機整暢理得然卒師頑空上竺不能強也主禪惠擇陽報國藥師治平戶履日接別爲堂以處篝燈星列咸曰是宜繼四明矣歲旣久卒以輿論主延慶至元二十六年寺延燬芟舍草緝講論彌不輟大德元年九月某日入寂僧臘六十年七十有九奉遺骨歸于祖關桷居邇南湖幼歲游起信堂羣僧誦聲接几席取其書讀之茫不能解泰寓曹先生說曰取子直約說讀之斯解矣後來南湖觀其容和以莊其說坦以明始悟曰先生語不虛矣歿三十有一年弟子允恭來請曰公深知吾師吾教有行業碑敢以請乃不得辭銘曰

天台之宗明性合理銖縷有別弊極口耳以言顯道言曷有止若舟在川茫不有涖若蓬繫風去莫以趾

支離演文。積香繡楮。迷途其茨。珠探濁水。至簡以求。允究厥旨。聚不滿握。邇納步跬。解其桎梏。一貫真詣。南湖之庭。屢屢纒纏。振塵一言。聞者竦起。遺書具存。毋敢訾毀。昭哉是銘。千祀勿圯。

空山雷道士墓誌銘

孔子曰。文勝質則史。班固亦曰。道家者流。出於史官。豈其然乎。老子爲周藏室史。酌古今治亂。成五千言。致用以準易。較其治良不誣也。噫。爲老子者。其知此與。河圖洛書。聖人則之。易書誠經緯也。微言旣湮。傳注門戶。各立自勝。易與書迄不能竝。士方斷斷。然不可參錯。進老子之說焉。得力而勝。諸士患無恆心。遇不遇命耳。曠百世而相感者。吾得一人焉。曰雷齊賢。始予讀其書。益知其所言。病乎世。莫知其涯也。齊賢所爲書。援據切至。感厲奮發。不蹈世俗繩墨。合神以窮變。盡變以翼道。申言廣指。其於力誠至矣。今知齊賢者。不若是。則齊賢之意。將終無以自表。齊賢於書。無所不讀。悉資以爲是書者。其道然也。道散於九流百家。同歸而殊塗。唯老子最近。然則易老誠相表裏邪。嗚呼。齊賢之志。予深知之矣。齊賢著書曰。易圖筮通變義。老子本義。莊子旨義。所爲詩文二十卷。和陶詩三卷。齊賢名思齊。家世臨川人。幼棄家。居烏石。觀晚講。授廣信山中。暨終也。復歸烏石。治其窆。而先表焉。表曰。空山雷道士之墓。卒時年七十有二。番陽吳成季。廣信弟子也。嘗曰。空山先生承絕學於蕩裂。繕刻志意。卻甘茹苦。光景變幻。皆隱隱不道。飛伏控握。愈眩愈遠。道無有矣。今遺書具在。匪吾徒私彰確者。如是則行若藝。猶其麤也。陳郡袁桷以是銘。銘曰。入而不出。神不可以物通。而不塞。用不能以忱。膏軸御輪。其行彌跋。無適不宜。曷問其津。生以道爲樞。死

以天爲徒。有隆空山。泉流舒舒。矯爾後人。抑華食實。弗續弗離。我銘是質。

戴道士墓誌銘

予讀桃源記。私竊以爲慕。肥遯有遺於世者之說云耳。後讀地志。則沅南地。今號爲桃源者。不與王化邇。安食水土。無君臣守令之程節。於徵需乎何有。嗣後地益闢。桃源遂爲壯縣。溪峒增爲十州。今烏能辨桃源也哉。或曰。州有桃源宮。累聖獨復。山水清湛。其人惇厚直且信。使能居之。寧非桃源乎。戴君道安和甫其人歟。和甫成童。辭家爲道士。性疏曠。無畦町。其師王君文卿器之。俾遠游。見開府大宗師于崇真宮。隨其委令。風雪承給不少替。請於人也。事弗就弗止。而人不以煩避之。處於衆也。率退以自持。衆先矣。而君亦跂焉。以及之。故亦受制爲龍瑞宮提點。奉香于武當桃源。性不喜藏否。遇酒。嗒然以忘。然不復失事。故職教者。彌任器。世人以記短長。逐日影爲能事。君不能且鄙。恥較其得失。是真無懷尊盧之民矣。豈唯桃源民哉。往歸其宮。攜酒邀父老。游白馬洞天。洞近長嶺山。酒酣。援筆述韻語曰。吾死必藏是。延祐七年。還京師。明年改元至治。正月某日。微疾以逝。年若干。斥其囊資。不能以斂。遺言以弟子李禮謙領宮事。和甫在崇真。度弟子天台徐信初。厚禮翰林待制虞君伯生。俾教之。伯生與予皆故家。見後進傲誕。不復與語。獨信初給事無惰。聞論文獻道德。嘗惕悚不自置。信初果能爲請銘。君斯無憾矣。某月某日。葬是山。銘曰。棄方剗觚。睢盱以趨。何誕之日。多樸莫能扶。瞻彼沅溪。中季載圖。其德弗離。其人允符。持觴養和。奚憾之祛。命也不尤。卒爲天徒。

通真觀徐君墓誌銘

開府玄教大宗師張公留孫。以玄道贊理。陟降帝庭。踰四十年。其承次授受。同流一源。罔有支別。故其弟子相傳。多至六七十人。以文辭議論達國體者爲之嗣教。其餘彬彬行能。清整英發。林立輩出。或激昂自脩。則俾之擊綱振維。往來京師山林間。重其名教。若是者寧不備矣。夫開府弟子之最長者曰徐君。余官翰林十有六年。未始識之。延祐四年。開府年七十。始來上壽。閉戶不復出戶限。邂逅予庭中。若相避然者。集賢大學士李公某傳。詔醮崇真宮。益避跡隱奧中。集賢語開府曰。聞高弟在。是願接顏色可乎。強之見揖。以退。復辭其師曰。弟子歸山中不來矣。願師自重。至治元年。專价走京師。作訣別語。衆咸疑焉。未幾訃至灤陽。以夏五月癸巳。化于仙源宮。得年八十有二。於是嗣師真人吳全節。率其弟子。爲位以哭。皆不勝其哀。且以狀求余銘。維徐故士族。祖某。父某。君名懋昭。字德明。饒餘干州人。饒爲衣冠望郡。宋端明湯文清公。丞相江文忠公。善衡鑒。幼獲接識之。由是棄仕。譜爲老氏學。以其道游江淮間。于時烽燧連警。百里土舍不相接。獨澗飲草茹。以善勸勵。俾崇信其法。後皆化之。開府公入皇朝。隨侍二歲。卽歸。且誓曰。釋老以寡衆集。施爲能事。叩門嚙嚙。抑獻笑。且取誚。吾不能若是。當益貶損焉。積數十年。作仙源觀。久之復作神翁觀。佳木奇卉。編緝墾治。山林壙畝。陂塘之利益。充然衍裕。卒能遂其初言。歲饑。以餘食餓者。不足則損直以售。葛衣布幘。十數年始一易。見者服之。老氏之學。力本自治。退足無欲。其言黯以彰。不知者以虛無釋之。邈不相涉矣。夫不丐於外。則必慎於內。宮室蔬穀。絲麻丹漆之物。燕興俯仰之節。酬酢進退之儀。

人之生不能以缺也。今而曰吾無求焉。將何以取具。世以役鬼神竊服食爲道。吾不能知之。不惑於衆。則害於民者寡。考其自治。則於吾道合。清淨富強。昔之時君嘗師之。則凡刻繡者誠得矣。夫何疑焉。余嘗侍開府公。言語絕臧否。耆而謙默。而簡退與嗣師游。彌綸損益。將以行其道。是非家庭之教。績業纂素。能若是乎。盛矣哉。大德六年。制授主常州路通真觀。皇慶元年。制加保和通妙崇正真人。二觀亦以璽書尉鎮焉。以是年某月日葬某山。開府再傳曰。李立本。陳義高。義高明。朗通豁。器行瓌特。贈粹文冲正明教真人。皆蚤世。今以次傳者曰。余以誠。何思榮。吳全節。孫益謙。李奕芳。毛穎達。夏文泳。薛廷鳳。陳日新。餘若干人。將葬。開府惻然曰。吾弟子蚤從吾游。其亡也。不宜以薄。乃命奕芳歸。泔葬。銘曰。

林林生民。厥初一原。帝霸肇分。兵刑日嚴。維玄元君。治道不繁。節約寡求。罔有僭貪。榮觀超居。導迎泰和。絕色屏味。日用不頗。後侈怪奇。風揮電訶。造舟構臺。百靈迄訛。赫赫大帝。尊企清淨。玄風恬寂。守貞自正。溫溫開府。不夸不佞。于帝左右。淵默無競。在師承之。儉以繩之。泯泯自營。卒克與之道。合古初。訖莫我病。銘昭真宅。是式是證。

陸道士墓誌銘

道家者流。以清靜無名爲本。時王以其宜於治國。靡然宗之。傳世益薄。長生之說侈。卒茫昧不復講。今世所傳。唯法藥與術藥。術又鄙棄不用。而法僅傳。謂其宜於水旱疾病。通得而用之也。余行天下。與方外士游。率不得一。二蓋其傳受訛缺。浮靡恣蕩。攝思握神。罔不知所以。而其祛役禁制。按圖以求。叱咤瞬息。欲

通靈於胥蠻。不可得也。噫。其教若是。而爲其學者。又皆不自植立。可哀也矣。余居近東嶽行祠。有陸氏者。掌其祠有年矣。其四世孫曰頤真。幼歲識之。儀觀秀整。淵乎抱道之器。與之語。慎重不伐。悒悒然欲求其師。未能也。日尊所聞。抄綴盈篋。樓楚公諸孫。坦好黃老。能以參考損益。編簡往受其說。遂爲弟子。後聞天台桐柏山。有靈寶法。福聖觀道士曹君爲正傳。往師之。又聞維揚潘師。得白真人上章法。遠游以受。然不自表襮。處羣衆。益簡默。丹經筮書。星曆孤虛之術。悉究詣旨要。晚得末疾。疾漸革。呼其弟子陸宗玄。張蒙生。語授受本末。且曰。我死。必得袁內翰誌文。以信後。是死爲不朽。當葬我於先母之墓側。墓在翔鳳鄉白石紫虛觀右。紫虛樓君所建。實繼其事。曾大父軾。大父景文。考斗瑞。生宋開慶元年。歿時年六十。有七。實泰定二年七月某日也。葬以某月某日。其弟貴和。實來請銘。哀其志。嘉其勤。而卒不逢。非命也。與銘曰。握奇制氣。超鴻濛。約束萬神。驅靈風。物無疵癘。玄感功。祕圖靈籙。昭羣蒙。後生棄暴。甘盲聾。嗟哉紫虛曼仲。仲踰江越嶺。冀一逢。死生晝夜在反終。不但其化輪旋空。恍兮步虛出雪中。有縞之鶴來城東。

清容居士集卷第三十二

行狀

翰林學士嘉議大夫知制誥同脩國史趙公行狀

曾祖伯洙宋朝請大夫知南外宗正事贈金紫光祿大夫

祖師雍宋朝議大夫直寶章閣

考希聖宋宣教郎史館校勘

公諱與憲字晦叔。宋燕懿王德昭九世孫。高祖子英宗正少卿。避地南徙。紹興間爲台州黃巖丞。家于縣之西橋。至其子孫。遺育蕃衍。故今號西橋趙氏。宗正有孫師淵。字幾道。官至太常丞。爲朱文公高弟。文公述通鑑綱目。條分例舉。整齊芟奪。迄于成書。皆太常所定。其言理學蘊奧。心受耳屬。精析該邃。非若語錄所傳。剽臆謬妄。東南後進。咸尊太常與黃幹氏竝。於公爲伯祖。公少美儀觀。昔吐清徹。讀經史大義。必本家訓。弱冠以易入宗學。登咸淳辛未進士第。用積舍法。教授鄂州。鄂爲楚上流。歲備武不懈。公視邊將。翫弛而咸淳士大夫率恥言邊事。乃策諸生而問曰。文武之用。不可偏廢。韓范二公。不以言武而失文。曹彬狄青。不以清談而喪武。文事武備。豫然後立。時未幾。王師絕江。守以城獻。公自念爲宋國族。鄂先內附。兵勢若破竹。不可支。而歸道已斷絕。不得返。遂上書丞相巴延。松年案舊作伯顏公言。宋權臣賈某柄國十有五年。

脅威罔主。棄背信好。事一至爾。今得冀如藩臣。歲奉貢幣。願緩師以行成焉。書未報。而錢塘已下。實至元十三年也。公知南北已混。復上書。丐返田里。會大臣有奇公狀貌。告于世祖皇帝。十四年。遣使上驛來京。師幅巾深衣。見於上。京天子清問溫渥。首詞其老幼及江上事。首尾其對。復如上書所言。特命給廩餼。以俟用。明年。奏言江南郡縣戶口繁夥。當以簡易治。近歲有司急切興利。殊失安輯新定之意。臣生長江南。悉習利害。因條類爲十六事以進。大較以擇守令。釋征斂。厚風俗爲急。而未復以存活趙宗爲請。十六年。入翰林爲待制。陞直學士。復兼集賢。又三年。遷侍講學士。預纂實錄。加太中大夫。於是侍講十四年矣。累疏乞致事歸里。雖未得旨。而不入翰林者幾二年。久之。拜翰林學士。自鄂之來京師。凡二十有七載。由里居而之鄂也。適三十年。每恨乖隔愈久。冀一得請。以終老丘壠。常忽忽不樂。秋風倚楹。懷悲故鄉。擁衾障袂。聲出金石。非復以宦達爲可戀惜。而志迄不遂。抱疾暮歲以卒。大德七年正月二十有二日也。年六十有二。積官至嘉議大夫。公之爲侍講也。言江以南括責營聚。皆大臣與其黨類。私植貨累鉅萬。願寬今年田租。以緩赤子。宋世陵寢毀掘。及移徙故宗室大姓。皆非初詔本旨。乞正其私擅之罪。天子以爲然。又言乃者庚寅歲大霧四起。越翼日癸巳夜地震。地爲臣道。臣強則震。至正月甲辰。西城老虎就擒。虎於象爲兇爲金。其著尤異。咎在姦臣簸權。今已執咎。而宸斷未果。願蚤正天誅。以應變異。上意若微忤。而終不以罪。由是居家待罪。閱三月。大司徒公自上京俾燕。只干學士諭以復職。後平章政事博果密松年案舊作不。爲公奏逋負歲積不能自養。上曰。得非指僧格松年案舊作桑哥爲虎者。宜令有司計逋以償。歲別給帛粟。餘勿

爲例。人益知世祖皇帝神武沈斷。非真忤公。公天性疎達。與人交。緩急高下。盡力傾引。弗避。不爲刻峭。自高。亦不復計得失成就。故始爭趨慕。而間輒掉去。訖無毫髮恨意。傾觴養茗。費盡卽止。危坐清論。一不以靡密缺乏。廢其雅道。歲時奠薦。雖甚匱罄。猶豐潔盡力如舊禮。自宗正四世而下。皆請于朝。而復其役。族屬男女。以及鄉里之俘虜而北來者。悉贖以歸。凡十一人。有張生貨樂西關。一日過之。張死已數月矣。亟歸視藥券。盡酬所負。其家人不知也。遂具以告而歸之。一士人伺公錫賜時。謾言當買田。毫宿間。計資與之。歲久不至。後亦不問。其受欺類如此。同列有悔公爲方拙。暨死之日。朝野咸曰。善士已矣。各賻奠哭弔。終其斂事。而同列亦悔昔日所侮爲可愧。往右丞許公仲平。篤意道德性命之學。奮自飭厲。以文公四書爲標準。達官高胄。皆俛首承訓。不散怠。公時至京師。首言力行致知。近世率清曠自高。言行若柄鑿不相入。非儒先本旨。許公深然之。至觀其平居處身待人。抑華養實。許公雖死。而昔時門人親聞其言者。皆以爲伊洛源委。惟趙公爲真似。益以知太常之學爲可信。至公爲有傳矣。有詩文若干卷。類聚藏于家。初娶舒氏。御史中丞竇之五世孫。未踰年而卒。斂篋中裝。歸其婦翁。不聚。今夫人史氏。奉直大夫知連州一之之女。生三男子。長孟實。以公居朝廷久。特官爲承事郎。同知瑞安州事。孟賚。温州蒙古學教授。孟貫。以廕入官。孟實等欲求銘當世有道。以信于後。俾桷有述。謹具歷官行事如右。謹狀。大德七年七月日。從表姪具官袁桷狀。

推誠保德功臣開府儀同三司太傅上柱國追封薊國公諡忠哲梁公行狀

公諱德珪。字伯溫。姓梁氏。大興路良鄉人。八世祖德成。遼末以勇力善賁。雄鄉里。生子吉。不仕。吉子伯溫。金皇統進士。官通議大夫。同知河南府事。遂贈吉安定郡伯。郡伯孫牧。牧子陟。明昌進士官中奉大夫。同知南京路都轉運司事。亦贈其父安定郡侯。郡侯有別墅。金世諸名士。日觴詠從之。游中奉。髫年能以詞章相周旋。咸器偉之。晚歲直節善政。深自植立。值金亡。終老於里。生衍。爲金承奉班祇候。祇候生守信。終隆興都轉運鹽使。轉運生國禎。終內藏庫提點。是生公。後以公爲左丞。時朝廷特號中奉曰通憲先生。轉運贈榮祿大夫。定國公諡忠毅。提點贈榮祿大夫。安定郡公諡僖敏。公幼歲給事昭睿順聖皇后宮中。奇其器骨。俾熟國語。通奏對。年十一。太府長官愛之。帥其弟德瓚。同見世祖。命相者閱二兒。相者曰。後當貴。帝領之。遂使從東平忠獻王安圖。松年案舊作安童習憲令儀注。十四年。卽襲父職。至元十六年。升中書左司員外郎。二十三年。遷右司郎中。踰年復左司。二十六年。進太中大夫。總管大都等路打捕府。仍領左司。是歲復右司。二十八年。參議尙書省事。復遷中書。二十九年。世祖特旨拜參知政事。成宗卽位。陞中書左丞。大德二年。拜平章政事。公未弱冠。卽官宮省。踰三十年。錢穀出入高下。若指諸掌。四方奏請。率面授中書掾。言某事當如律。某當如先帝某年所行。極邊宗王。急驛調發。卒無所從具。同列拱手不能語。公徐言軍用有故實。泛索非故事不可行。執筆量劑。退考故籍。無少訛誤。戊子歲。地震北京。世祖問。今歲刑部所報囚徒何煩多。公對曰。囚非犯罪。特以徵索羅織。無所從納。故悉爲囚。在獄中。上大感悟。乃悉赦天下。逋負京師。供給繁夥。屢奏蠲復之。漕運根本江南。浚治諸湖堤。不宜使富民侵塞。以殺水勢。議自公始。選部資

歷吏不敢後先。一時以事功自期者，公亦與一二執政議超常格，俾自效。方大德初元，成宗恭儉守成，一繩祖武，公亦以朝政自任。年穀豐熟，四境寧謐，廟堂大臣相戒以清淨爲治，凡尙書言利害，斂口不敢發。自是希進者皆避匿，後議相持既深，朋聚比進，乘事間發，浸淫於疑似之際，會上不豫，遂出公湖廣安置。踰年，上疾稍瘳，罪一二幸臣，急召公還都，遂乘驛朝于上京。上問卿從何來，公環視嗚咽，不敢對。上賜酒饌，命歸省其母，諭以將再用。至九月，詔復入中書。時公已得上氣疾，與家人言，向嘗遠謫，今得再覲，上明白，母字相完聚，卽死且不恨，何敢復有希進意。遂卻藥危坐謝事。某日星殞西南，有光流室中，是夕薨，年四十有六。葬于宛平之樊村，妻安氏，今封薊國夫人。柔靜能家，子一人，某，女三，長適納速刺僉事，次適伯達某路都提舉，幼適某同知宣徽院。今上改元，詔祿勳舊贈公推誠保德功臣，開府儀同三司，太傅，上柱國，追封薊國公，諡忠哲。而公祖父亦復追命爲國公，母夫人完顏氏，公能承侍盡道，待二弟曲致恩意，對賓客謙不失禮，自以先謀躋世科，尤重儒士，詢考安定別墅爲圖表章。一時縉紳咸賦詠追美其事。侍帝左右，率偵候意，饗拔士類。至於決事占奏，悃款不讓，而悉簡愜稱上意。死雖十餘年，朝廷至今猶稱道之。前翰林脩撰知高郵府張某，次公遺事，命桷演潤，將求鴻藻以表墓道。桷與張侯囊同在翰林，見一時行事，張侯以親嫌爲辭，公之弟德璋，今益都總管，昔爲慶元判官，時桷居鄉里，得聆公言行，遂不敢以草野爲辭。然舊聞中原故老，嘗言梁斗南文采風度，有陶靖節晚歲志意，後進爭慕企，久知乃通憲先生也。先生言行在人口不絕，方金將亡時，士族解散，斷盡，暨獲平定，推原高曾名字，於荒碑野塚之際，皆缺軼。

無所考。獨梁公八世官簿。歷歷可据。德源深長。通憲守儒之效著矣。至若公行事在史册者。不敢有私姑次其出處大致。使銘述者有考焉。延祐三年九月某日。翰林待制承務郎兼國史院編脩官袁桷狀。

翰林承旨王公請諡事狀

公諱構。字肯堂。世居濰州。家譜云。與中書令同系。八世祖某。宋世爲司農卿。守鄆。因家焉。故今爲東平人。曾祖某。金進士。奉訓大夫。滄州無棣令。祖某。以公貴。贈正奉大夫。太常大卿。考某。贈昭文館大學士。資德大夫。公幼歲肄業郡學。試詞賦入等。杜先生仁傑深器之。賈文正公居貞。一見。館以教其子。載與來京師。時太保劉文正公。王文康公。王文忠公。持薦士權。卽辟爲權國史院編脩官。丞相史公耶律公。在政府。聽公上事言論。接以賓禮。耶律公復戒其子以兄禮事焉。至元十一年。授將仕郎。命爲眞。于時集議時政。必使公預會。裁酌之。十二年。丞相巴延松年案舊作伯駟出師諭江南。公實草詔。是歲渡江。世祖命翰林直學士李槃與公偕行。俾蒐擇儒藝之士。明年春。次杭州。公見董壽公某曰。故宋圖籍禮器具在。宜收其祕書。省天章閣。翰林太常考集目錄。宋史異日必脩纂。遂悉輦歸于朝。十四年。充應奉翰林文字。公辭曰。少嘗受學于李先生謙。今先生猶教授東平。實不敢先。遂以其官召李。明年始受之。十六年。陞脩撰。凡制誥。撰述。文康公必以命公。丞相齊魯國公和爾果斯松年案舊作和禮孫。下同領翰林。開司徒府。授府司直。世祖詔大臣議道藏可焚棄者。公與議完救之。十九年。丞相阿哈瑪特松年案舊作阿合馬敗。齊公入相。議選舉更定法。皆公手定。遂授吏部郎中。未幾改禮部。後復吏部。而翰林制誥。猶諉公參詳焉。二十二年。遷太常少卿。上方定宗廟脩

禮樂而公昔從故宋所輦還者皆得補缺二十四年出爲江北淮東道提刑按察副使御史大夫率公陛辭上賜酒慰遣擊姦惠民淮民猶能言其事二十七年除治書侍御史故相僧格松年案舊作桑格下同嫉公命與故平章魯公博果密松年案舊作卜忽木檢責燕南逋負公先馳驛會計簿領迄無所迎合謂魯公曰公近臣某復在言路相若苛責當受罪不以累公也未幾僧格伏罪二十八年調選江西二十九年改翰林侍講學士三十一年世祖升遐成宗嗣位分院上都制誥多公次定徽仁裕聖皇太后知之特賜楮幣七千五百復命讓世祖耐廟諡册攝司徒以導禮大德改元纂脩世祖實錄陞翰林學士二年參議中書省事右丞相引見于柳林上問昔從何人丞相奏是和爾果斯官屬真儒者昔奉旨參用儒生今故用之時上初卽位勵精文治年穀屢熟海內熙洽公從容二相間以薦士安靜爲急務後數年來執政希合生事將檢括增羨首以其策行東南公卒不肯附稱疾納祿幾一年七年朝廷更政獨公無所累歸里九年授濟南總管禮法自持嚴而不苛凡爲民害者悉除去丞相答刺罕見公所申牘咸從之十一年太師瀋陽王等奏俾乘驛造朝拜翰林學士承旨復脩兩朝實錄特命贈公二代公言臣本儒家遭逢四朝先世皆潛德里士大國美諡懼無以稱以臣所居官授之誠以爲過今羣臣封諡下太常必由翰林議官品臣首踰越將無以服衆今上時爲皇太子嘗詢翰林老成必首姚燧王構手以酒賜之是歲尊諡祖宗公讓太祖睿宗皇后諡册賜楮幣萬緡正月讓皇后册文攝侍中讀册至大三年以疾薨公在朝廷踰四十年凡累朝憲章損益能悉舉源委翰林述作自爲編脩時已預讓先賢文懿尊酒敘論咸有据依欲輯爲臺閣舊聞而事

莫遂崇拔後進。雖未識面。汲汲稱許不絕口。性剛直。有不善。必面責之。有文集三十卷。藏于家。子士熙。今爲翰林待制。竊惟聖朝褒錄臣下。見於令典。謹撫其居官行事。請於太史。上於太常。至若居家雜儀。治民遺事。悉弗敢次第。延祐三年九月日。門生翰林待制承務郎兼國史院編修官袁桷上。

李司徒行述代作

嗚呼。我先公之亡。銓時年十有三。遺言懿範。誠不盡知。雖知之。亦不能盡詳。少鞠于趙氏外家。外大父諱某。爲南京同知。先夫人嘗泣語銓曰。汝父沈靜寡言笑。篤志嗜古。卓然遵聖賢言行。爲矩範。強之仕。弗肯仕。凝塵敗席。家事靡密。弗顧疾革。猶執卷。矐然若有思。空約彌甚。間嘗曰。我幼孤。長兄樞密都事。教我撫我。繫汝舅之訓。汝舅生三子。長都事君從革。次總判君從謙。余敍爲季。生兵革中。我先君每誨吾兄曰。家世朔州。罹亂離。朝夕習騎射。今邊宇寧謐。諸兒宜守儒顯親。毋刻木吏爲也。都事受其言。朝夕以詔二弟。俾從學于九山李先生。徵吾詎願不仕。非其道不可也。銓幼不能必其成。後其語諸。又曰。大父之墓在朔州。地遠不能至。考其事。則有紫陽楊先生之誌在。戒其毋忘焉。不幸某歲卒。年四十有一。葬于南城柳村之原。先公旣卒。家益困。太夫人挈于外家。化治銖粟。率資以教。銓稍長。痛自感勵。有以其名聞于世。祖皇帝詔習儒業。入國子學。師許文正公焉。後直省闕三年。出爲彰德鐵冶提舉。又十年。同知歸德府事。始得致養于母夫人。元貞元年。過汴梁。將歸京師。不幸夫人卒於汴。卒時年五十有八。奉柩歸葬于柳村。相其地。水澗幽。不可旁祔。乃卜於西山金河口田峪之南。得合葬焉。冬十有一月某日也。元貞元年。爲翰林侍

制。又三年轉廣平等處鐵冶提舉。改工部員外郎。承檄視屯田雁門。雁門地近朔州。銓思念吾大父葬朔州。在鄴陽灰河西一里。今六十年。榛莽不可致。有楊先生英誌在。雖無能知。吾以誠求。寧卒使無知哉。翼日驗誌。徵旁近。卒無有。哭走于野。有老叟年八十餘。乃來曰。李府君葬時。吾嘗治畚鍤于灰河。今西一里。隆然者其墓也。銓泣且拜。得封崇以識焉。楊先生之誌曰。李君大父諱彥宏。由彥爲名者十八人。自彥而別爲玉者二十六人。其諱玘者。銓大父也。我先考。大父之幼子也。都事有子曰某。總判君無後。銓由是奉都事而下。皆合葬于西山。而灰河之墓。始樹楊先生之碑。推大父。彥後之德。遭時隆平。非若昔時之永隔。歲時省墓。則力猶可至也。楊先生之誌。又曰。大父爲山西西路課稅時。耳目所逮。纖悉必陳於長官。有以權趨牟利。卽峻拒絕。後患。或言郡縣始安輯。宜用重典。使不犯。輒面折陳白。非忠厚恤民本旨。先公之誌。翰林承旨王先生構。則曰。拱壁駟馬。流俗所恃。嬖者先公無是心也。銓無所肖似。自工部改授朝列大夫揚州路同知。臺擢爲監察御史。四年。少中大夫。河北河南道肅政副使。五年。移淮東。未幾。嘉議大夫常州路總管。不六月。召爲參議中書省事。又六月。除禮部尙書。復五月。轉燕河北道肅政廉訪使。改昭文館大學士。中奉大夫。治書侍御史。今上皇帝推寶存歿。於是得贈大父。資善大夫。司農卿。上護軍。追封冀國公。諡莊順。祖妣王氏。冀國夫人。考。榮祿大夫。司徒。上柱國。追封冀國公。諡端敏。妣趙氏。冀國夫人。嗚呼。銓無所肖似。承藉先德。先夫人之訓。歷歷在耳。願因朝廷光顯之寵。求文鉅公。表於墓道。俾李氏子孫。後有攸考。謹再拜。敘其事于右。端敏公諱從益。銓今爲翰林侍講學士。娶孫氏。封冀郡夫人。合三房孫凡幾人。

長某延祐四年九月日男翰林侍講學士中奉大夫知制誥同脩國史李銓狀。

資德大夫大都留守領少府監事兼武衛親軍都指揮使知大都屯田事贈推忠贊治功臣銀青榮祿大夫平章政事澤國公諡忠宣鄭公行狀

本貫澤州陽城縣澤陽鄉屯城里年四十七

曾祖珪不仕

祖臯故忠昌軍節度使

父鼎故鎮國上將軍湖北道宣慰使贈銀青榮祿大夫中書右丞諡忠毅

公諱制宜字扶威澤州陽城縣人大父節度當金危亡時以智略慷慨衛拯里社與屯田陂池之利年不展用是生忠毅公提天師勦羌蜀絕襄漢奇勳冠勇功次表焯官譜始著公忠毅公之嫡子也方勝衣時忠毅攜見于世祖皇帝特視偉之命從大臣習給事儀忠毅遇寇死難世祖震悼乃即授金符襲平陽太原之軍而戍鄂焉公盛年受殊數益矜謹自重控伏將士帖首無撓犯湖廣行中書治鄂戎帥策馬進退承教令縮蹙不自給獨公爭器重傾下鄂守缺長執政俾攝治日坐決文武兩府郡益以理凡數歲訖不除鄂長官十九年詔治樓船有事於島夷江澚地不足居船官城南有何家洲洲爽廣多居民中書行令遷洲屋仆徹墟瓦聲涵撼白日交走驚泣道上公行相旁近地與洲無異即趣還其居洲民爭持牢體拱謝公揮手曰安民吾職也何謝焉鄂多火災連晝夜交作或言城中隱姦利羅疑似者急治火可止公言

咎在火政不朋。火未絕而復誣構。彼何生爲。遂率軍士申令。約立渠巷。俟火所未至。通徹其道。火是日乃止。有盜私立部。號伏近郊。日暮剽劫。負擔者訛言將入城。索之不得。見數男子從城外來。促數異。顧命縛之。省貴人曰。得無以疑。誑誤將出之。明日過城東門。見一少年乘白馬行。且色動。公呼曰。汝賊也。汝貌良人也。何作賊。不速言。當訊汝。少年叩首吐實。復信宿日所捕亦同款。一郡大驚。二十三年。徵入侍中。明年從駕北征。願前敵效擊。上曰。鄭制宜死。唯一子在。宜勿使擊。復請戰。乃命從太師以行。師還。詔侍膳殿中。加懷遠大將軍。樞密院判官。春駕如上京。院留毋行。公曰。年少宜服勞。願以偕行。上愛而勿許。二十八年。超拜湖廣省參知政事。是時鄂大臣集括斂爲奇功。上怒。錄其家。公入辭。上曰。而父死賊難。賞不及于汝。今有盜臣。貨財僮孥。留貯于鄂者。宜擇精善自取。公對言。某臣家入皆賊穢。不可詰。受之雖無汗。然跡其由來。寧無汗乎。上益奇之。鄂爲舊治。土俗厚薄。悉周知其隱。蘇枯翦彊。翕然至和。上知其能。賜中金五千兩。間歲具口奏。臣向留鄂治兵。臣母知臣年未更事。乞臣侍陛下宿衛。今不以卑鄙。預外政府。朝夕思念。不勝任。敢昧死以請。復徵爲內臺侍御史。安西地歲牧馬。牧人利曠遠。率併入旁近世業。民數訴理求地。持軋不下。命公乘急傳治其事。覈地得三十萬頃。考籍于官。餘悉歸于民。三十一年。拜行樞密院副使。院治衡州。公統軍入衡。下令不得入廬舍。營部擇便地。定井竈。食罷畢發。至暮整列。就次。道遇雨。卒言宜止。頓舍休憩。公立兩指畫。訖一卒無敢宿民居。道旁市井人雜語。不知爲官軍也。湖南地介江廣。賊負險。煽昭賀。聯絡廬陵諸屬邑。大軍至。卽守固不復出。歲一捕寇。率害善地。寇伺去。復獻集如故。公至。相隄塞。雜

耕守戍。據其出沒。明語歸降者。釋弗殺。逐殲其酋長。茶賊譚計龍。匿兵器。有異志。立捕得之。其弟昇。貨以緩事。公趣輸于軍。卒正其罪。成宗皇帝改元。復別置副使一人。與公同治。公謂官盜常員。先置者當罷。入授大都留守。領少府監。未幾兼武衛親軍都指揮使。知大都屯田。始進階資德大夫。公幼熟內府營繕。工巧供給祠祭之屬。能通達緩急。終歲事集無曠敗。至大宴席。刀匕樽罍。必命公董領。以重其事。大德七年。地震太原。平陽公承命往視。且言河東罹鉅創。聖天子出粟幣以賑活之。設一不及。是負明詔。死罪萬萬。何可追。乃躬入里巷。傷殘羸餒。悉疏錄以給。有市官利征商。詭言某地少災。不宜費官廩。征法宜如昔。無所損。公怒曰。幸災困民。民何罪。且汝計征入。何補縣官。入言于上。復其地三年。公天性懇厚。上宴大明殿。獨侍立不惰。命之飲。再拜辭。上察其意。賜酒二壺。使歸飲于家。事母蘇氏至孝。特封潞國太夫人。以寵之。錫賚無虛歲。復加賜海青。俾入禁園。尤號爲異數。大德十年二月五日。以疾薨。年四十有七。其葬在某縣某鄉。自公少時。已知自貴。乞名於王文忠公。王見而器之。遂定其名字。忠毅以死事顯。故公彌欲以忠孝勉獎。通敏有持守。其居鄂十年。善政藹著。至今父老言。鄭公真清士。非他人比。至守官靖正。不以喜怒害事。謙抑自晦。中朝士大夫。則曰。鄭公真吉士也。配可烈真氏。丞相孛羅公之女。子鈞。今爲懷遠大將軍。武衛親軍都指揮使。至大更元。特贈推忠贊治功臣。銀青榮祿大夫。平章政事。澤國公。復下太常。定諡曰忠宣。謹具歷官行事。鴻筆碩彥。得以取擇。謹狀。

榮祿大夫大司徒特封饒國公吳公行述

本貫饒州安仁縣開興鄉壽樑里。

公諱克己字祥甫維吳氏遠有令緒泰伯以至德讓嗣逃于吳周受殷命大封同姓而泰伯胤系因食采吳地子爵不絕周既衰吳越楚爭王吳爲越所債子孫散處江湖間因以國氏夫差六世孫芮爲秦番令有德于番號番君漢次芮功封長沙而廟食番世不絕宗庶蕃衍凡占籍番者悉祖之安仁吳世儒家宋淳熙間有從朱文公講學曰某皆其譜諱公之曾祖岳祖夢旂養潛樂幽丘園晏如也父鑑服儒業言行矩範閭里是否能持平善諭俾率初後皆尊信之劬書教子誨之曰學非以干祿遇不遇命也故公受其訓而行之幼靜默寡嗜好遠生養和非仁義之言不言其居家也斥絕喜愠躬行以導之不逮者微語以警之其處于鄉也肅然如有容暴者化之以慈有爲不善者輒自勵曰得無吳公知吾所爲乎幼督之以學壯獎之以仕稍有能輒譽之其成就也怡色若己得年益者賓客造戶無惰媮酒至愈莊夜分猶危坐治纖悉人皆曰吳公有子全節爲玄教嗣師總攝江淮荆襄道教崇文弘道玄德真人其好賢其持身常念若不及緊家教所致推公之德視其子則猶可企也延祐六年五月玄德扈駕上京桷以待罪集賢偕行公薨以五月丙辰訃至玄德晝夜哭不絕泣且曰全節不天疾驅以歸願述先公之行以聲其哀桷謝曰述德敍行宜在門人佐吏敢辭則又曰猶子善辱與子游其何辭謹按玄德真人幼慕老子道年二十從大宗師開府張公入朝奉祠宮間歲告歸省成宗皇帝憫許之大德八年公與夫人壽七十賜公上尊加帛俾乘傳以歸大德十一年特拜翰林學士中順大夫至大三年武宗皇帝隆孝治恩賚中外臣子

由是超拜榮祿大夫司徒饒國公配舒氏饒國夫人而公考亦追贈昭文館大學士資善大夫饒國公諡文靖妣陳氏饒國夫人玄德奉制書以歸延祐元年公壽八十天子遵成宗錫賜如故事延祐四年復降璽書復其家命守臣王郡中表鄉曰榮祿里曰具慶玄德築公所居堂曰晚香曰天爵翰林侍讀學士元公明善記之矣曰齊老則因宋孝宗所書扁以徵其實曰樵隱公所居自號以寓其沖澹之意焉公壽八十有五將以某月某日葬于鄉之山田原子四人長詢次誠蚤卒次玄德翼人次全義女若干人孫男若干人善集賢脩讓蒙剛才致孫女若干人曾孫男女若干人始善來京師從游嘗出大父手書誠善制酒力寡述勿惕玩以自棄又誠其叔父持敬存誠爲應天事神之本日承君師毋以我耄爲辭幸未棄昭代嘗惕然深念曷報稱數數道途非所望假我死何憾也水蹇於山屈曲演迤遇順而始達非偶然也養深用齋累遠益振於吳氏有考世胄顛覆抑其所發者誠過耶嗚呼吾於是見之矣桷也辱再世之游耳受自矜向爲史官錫命享醴之禮嚴詳於記註惇史純孝贊皇風闡鴻藻有自來矣遂不克讓奉于太史俾有攷焉延祐六年七月日具官袁桷述

清容居士集卷第三十三

表誌

西山阡表

嗚呼我大父嚴州宋寶祐五年丁巳六月七日庚寅卽世年六十有七後六十有七年是爲皇元至治三年歲在癸亥聖天子推恩文武錫命有秩不肖孫桷以從臣遂得贈中順大夫上騎都尉會稽郡伯大母令人王氏會稽郡君是歲五月丞相忠獻王薦于英宗超拜侍講學士泰定元年又贈嘉議大夫禮部尙書上輕車都尉會稽郡侯郡君加會稽郡夫人嗚呼桷生七日而母史夫人卒先考處州嘗語曰汝外祖敷文轉運公諱賓之淳祐十一年辛亥歲秋八月病且革嚴州訶疾候所命于時汝母年六歲余年七歲卽指曰吾女以中外表願奉公幼子大父謝且立曰幼子獲爲越忠定王孫壻它日生孫寧負吾兩門哉桷泣受其語以識桷髻亂時喜聞遺事于時越公賓客子孫宦途著仕而大父遊從咸在嘗語曰越公爲京尹十有一年撻括隱伏抑強振惠繫汝大父密以贊外若韋布使世不知有子弟名字其居越公喪盡喪禮喪除廬于墓不入城府者三年匪惟鄉人言之外州士大夫能言之退考于家乘曰初補承務郎監無爲縣襄安鎮知建寧府浦城縣丞越公久侍從陞政府而執政子求外仕令不許故再任佑神觀紹定四年越公解機政始得授江南東路安撫司幹辦公事端平二年以侍養請于朝優許之充沿海制置司

機宜文字。淳祐七年。通判嘉興。兼尙書省提領田事。所檢閱。乃曰。吾得以仕矣。治府事無留難。囹圄以空。悉以越公尹京法治之。郡守謝不能。提領戶部財用史宅之。悉括諸司田。阿媚奉上。具籍百餘萬。用戶部印入御府。而以副帙置三省。始愀然曰。吾不可復治。乞歸。三年。授江陰軍。力辭以疾。後戶部果督責浙西諸州虛籍。守臣爭納告。巧罷言。諸司田皆朝廷舊籍。欲入虛籍。則宜蠲舊籍。未幾宅之死。始悔罷。而副帙在三省者。國亡。散落民間。言利大臣深信之。卒爲東南害。十一年。知嚴州。寶祐二年。提舉台州崇道觀。積官至中散大夫。鄞縣開國子。先處州登朝。贈中奉大夫。再以登極恩。贈中大夫。維我大父。訓範嚴密。居家治具。畢舉區別工技。悉精其能。堂奧危坐。無笑色。聚書至數萬卷。圖畫鼎彝。鑒裁得源委。而先處州遵奉誠令。教子晝夜不廢。楛得以藟薄文藝。敍升翰苑。幾二十年。再爲集賢直學士。今復超進爲翰林侍講學士。夙昔期望。於遺言見之。今墓在桃源之西山。王氏夫人合葬焉。大父諱似道。字子淵。曾祖諱皋。累贈太保。妣楊氏。越國夫人。楊氏。魯國夫人。祖諱昇。累贈太師。衛國公。妣楊氏。齊國夫人。考諱詔。少傅。同知樞密院事。資政殿大學士。累贈太師。越國公。妣陳氏。周國夫人。配王氏。平江府吳江縣。癯庵先生份之四世孫。蘇養直。向伯恭。張安國。朱元晦。諸賢賦詩于其家園。有詩集十卷。行於世。長子諱浚。奉議郎。淮西制置司機宜文字。入皇元。改授承務郎。賓州同知。娶史氏。孫四。曰棟。棣。孫女十。曾孫五。彥。毅。亨。端。辛。孫女一。先處州諱洪。朝列大夫。同知處州路總管府事。贈中奉大夫。浙東道宣慰使。都元帥。護軍。會稽郡公。娶史氏。楊氏。並追封會稽郡夫人。子桷。爲嫡長孫。女三。曾孫二。璿。瑾。女四人。四世孫男。曦。暉。女。德秀。袁爲鄞聞。

姓。晉政府由越公始。至于大父承緒。展世不赫赫以求高。命所居堂曰拙逸。曰得閒。殆見其雅志。將以俟于後矣。夫德厚者報深。特報自佚。必不能以顯。郡公事兄若父。讓爵避財。鄉黨至今能言。惴慄四十年。而教子督切。則曰我大父之訓。我不敢私。今雖未底于成。詩書之澤。殆能以自白。歲月逾邁。交友故吏。漸落幾盡。隧碑有缺。幾於無傳。是則有罪。矧以不腆之文。行于南北。庸述祖德。刻于墓道。俾子孫有考。秦定元年。歲次甲子。□月□日。孫具官桷表。

先大夫行述

先大夫諱洪。字季源。姓袁氏。袁爲明州著姓。州陞爲慶元。宋仁宗朝。詔外郡得籍開封。舉進士。嘉祐初。爲開封舉首者。諱毅。後通判杭州。蘇文忠公時爲郡太守。日論文史。典處州以終。贈光祿大夫。其宗諱毅。亦占籍開封。試進士。歷官至祥符縣丞。因家焉。爲公六世祖。五世祖諱謂。贈少保。高祖諱皋。贈太保。靖康難作。隨青州兵復歸里。積善好施。年八十餘。預言死期。別親黨沐浴端坐以逝。曾祖諱昇。爲明州助教。贈太師。衛國公。樹德力卑讓。鄉里尊信。郡有不軌大獄。命公攝治。卽其家搜驗。得僞署籍姓名一千餘人。皆六縣大家。不以送官。立焚之。異行遺事。世多所傳錄。妣楊氏。封太恭人。贈齊國夫人。祖諱詔。幼學于族父正獻公燮。登淳熙丁未第。嘉泰禁道學。自趙忠定以下皆入黨。止獻公坐廢。越公爲吳江丞。得罪蘇師旦。俱家居避禍。嘉定改元。襲敍趙忠定公。朱文公於是相次被召。先後爲侍從。搢紳榮之。尹臨安十年。神明愷悌。自辛棄疾。揚王休。馬大同。丘密。以後。推公次之。爲同知樞密院事。以資政殿大學士。銀青光祿大夫。奉

化郡開國公致仕。贈太師越國公妣陳氏。吉國太夫人。贈周國夫人。考諱似道。中散大夫。知嚴州。總覈事物。能通達損益。然不樂仕進。守次江陰。將行。乞祠祿以歸。理宗異之。贈中大夫。妣王氏。恭人。贈令人。公嚴州次子。七歲。能諷誦詩書。左氏通大義。以越公遺表恩奏。補承務郎。年十七。試吏部。銓監鎮江府大軍倉。明年。道臨安。馬光祖以樞密爲京尹。上書往見之。馬公喜。謂曰。是故袁越公孫耶。光祖治京師。皆先公條教。今官位適相同。然貴家諸郎。多不達文墨。是書果子所作。當留以自近。公謝不敏。遂改辟監桃源酒庫。檄入帥幕。時馬公號嚴敏。客多畏避。不敢進。率秉燭決諸曹事。命四客坐四隅。禁私語。夜分。間以成案俾閱。先後是否。一日。擇卷牘繁冗者。以試公。公疏其要領。言是事曲直。微有隱。某官所擬。微兩端。馬公大喜。日以不決事委處分。將俾徵旁邑。逋負。公謝曰。初入官。而以括責稱。懼失先公遺訓。馬公謝之。禮部尙書李公伯玉。薦可治劇邑。中書舍人劉公震孫。薦可理瘠縣。馬公去國。改兩浙轉運司幹辦公事。轉運使胡太初。刻峭善伺時相。意旨。公不樂之。請告歸里。胡亟怒。以綠匣檄還司。署曰。不卽來。當議劾。公起視事。或咎之。乃慰曰。太初先子。先樞密門下士。知子能官。固若是。後潛說友爲轉運。檄督寧國絹十六萬疋。公婉謝曰。嘉熙以來。江東稅絹。皆虛負實籍。寧國尤甚。莫若悉蠲虛名。止取景定。至今年逋。且昔時嘗以不能謝馬公矣。說友懼蠲數廣。亟命他吏。然卒不能辦。爲禮部貢院封彌官。甫出院。度宗忽降手札。諭賈某曰。舒津。太學名士。袁洪。嘉定名臣。孫宜。與陞擢差遣。舒同里人。賈疑有內援。遂除舒太常博士。公爲太社令。就職兩月。諷門下省論。而舒亦以他事去。賈相嘗曰。浙東唯溫處士可任事。四明士不宜用于時。高公衡。

孫趙公汝楫。以戶部侍郎汪之林。以汀州陸合。以軍器少監章士元。以太常少卿趙孟傳。以贛州合執政官至守倅。凡六十餘人。皆家居。月爲一集。約討論先哲言行。不得議時事。由是公益得紬繹文獻。深愛重自晦。絕不通京師書問。賈相悉偵知之。乃命主管華州雲臺觀咸淳壬申。遷通判建康府。公閱事敏決。老吏不敢詒慮。獄句容有僞楮連坐二百餘人。悉出之。定議止誅其首。帥趙潛貴。駭不親庶務。僚屬上府謁不得入。率用紫袋取畫諾。公坐賓次。命吏白帥。今邊事益急。惡少年掠奪市上。將驕不習兵。非紫袋可奉行。帥聞。卽延入閣。出遜語。且曰。將循視沿江諸屯壘。苟可安便者毋忌也。甲戌冬十有二月。帥行。郡中大驚。爭移徙出郭。而村落民與故侯聯絡者。復入城。有約白晝罷市。公詢屬亂者。斬之。戒門者毋納村民。城中始安。夜多火災。有微卒膽對詳練。公私以白金立署賊曹。一夕卒馳報。有賊約以二鼓縱火東門。劫門鑰以出。今賊俱在廟中。治火具。公遣卒往伺。賊將出廟門。捕二人。有縲火在手。卽斬以徇。諸將留城者。皆故侯部落。至是益蹇傲。願習射求官賞。且曰。在昔唯陳招捕習騎射。今不能復見此等相公矣。翼日。將巡城。請公乘騎。吏擇馴馬以進。公命取將馬。來將異之。坐城上。召諸將曰。郡庫非制置使不敢用。若等求較射。吾當以私財定高下。語畢。入射。將挾矢前。喏曰。願奉約束。然不敢先。公手弓。遂弦三發。皆中革。一入的。將謝不敢。公強之。終不能並。卒定其賞如初。諸將前曰。惜侍郎官晚。然事不可爲。公嘿然。侍郎蓋江淮間幕府通稱也。二月。帥調精銳居屯江城中。羸卒數百相偶語。有卒夜從江澚還。言趙制置已南遁。數日將解兵還。淮西總領費伯恭棄軍資。夜乘舟如通州入海。賈相師潰。歸揚州。諸將率故侯部落。將劫公出城。

公不得已。微服問道歸臨安。見太常丞吳浚。浚舊爲沿江參議。與公厚善。相對各泣下。公曰。國勢日蹙。諸將率聞風內叛。浚薦丞相陳宜中。將留用之。公願自劾待罪。急辭去。趙公孟博尹臨安。奏爲浙西安撫使。機宜文字不拜。趙公制置慶元。復奏爲沿海制置司參議官。公時已陞階朝奉郎。亦不拜。乙亥冬。臨安奉表降。謝太后詔諭東浙諸郡如命。戒毋徒以百姓汙鋒鏑。時入南軍道上虞餘姚。焚掠以行。聲言留軍慶元。備禦居無何。王師將壓境。公見趙制置言。南軍以具海舟。實無意留旦夕。必入城縱焚。當先攻甬東門。宜戒火政。分卒保東城。以全居民。未幾果縱火。焚浮橋。劫江澚城。有備不得入。舟出定海以行。制置司改宣撫司。復署爲參議。人心危疑。旁郡邑相屯堡未散。舊不快意於衣冠者。爭上變入爵。參議官陳允平。素與王姓讎。讎言新從福州航海來。見陳參議。爲書蘇都統。約以九月乘颿下慶元。當出兵以迎。又言禮部尙書高衡孫而下三十餘人。皆聯署勸進。時張元帥督師將征南。命招討使王世強圍捕鞠實。公儒服立庭庀。見王辨陳參議與聯署書實亡。有招討故爲宋官。寧知讎不爲虛言。王未應。有戎服長髯者。將登階。見公亟下拜持抱曰。此吾袁侍郎。詣王前曰。傅海舊爲建康壕寨官。承宣使阮思聰與侍郎巡城。議列木柵。阮言城廣不可守。且木柵無所從得。傅海答曰。蔣山左右巨木可取。撤近郊居民屋。高下附益。可立具。使果欲守。良無難。阮故呂太尉姻。盛怒。將以軍律抗對殺海。袁侍郎悟旨急。叱海入獄。明日杖海而遣之。今不知侍郎何故立庭下。海願以身贖罪。王大驚。具賓禮以迎。且告元帥。帥引問之。故。公言安反側。定新國。當絕告訐羅織。翼日。元帥盛軍容坐府。有告者。復言奉化昌國某大家。以故王爲名。一從台州黃巖來。

一從海上來。帥立叱去之。陳參議亦由是得脫。郡大疫。具善藥以施。死者給棺以殯。後戒以爲常行之。踰二十年。至元十五年。從趙公朝京師。覲世祖皇帝。天語命班秩宜高。從行者一等。將授總管。以子幼辭。乃授朝列大夫同知邵武路總管府事。以疾不赴。至元二十年。授温州路同知。疾作。復辭。公幼從王先生鑄學問。戒以躬行爲持身本。每授以言行編諸書。公守而行之。至是書陶靖節詩。顏氏家訓爲一編。以寄意。至元丙戌歲。侍御史程公奉詔徵士。首寄聲起公。公遜謝不敢當。大德二年。改授處州路同知。命下。而公已捐館。實是歲二月十有八日。享年五十有四。先大夫性孝友。事兄賓州如父。器物田宅。賓州所予者。猶辭不敢受。嚴州遺澤二。悉讓兄子。淡嗜好。自建康歸。卽獨處請坐。嘗曰。綺縠聲色。非潤身延年佳物。諸君何慕焉。喜賓客。終歲無虛日。客去。復具饌以俟。不喜言人過。或甚不能自重者。猶覆護言無是事。急施與。家無長物。嫁娶喪葬。有不能舉者。悉賑與之。愛博而內明。碩儒故官。旁邑外郡。俱館致。教子弟。嘗言吾交游宜廣。汎愛親仁。勿爲臧否可也。有客素依公。調官京師。願奉公文書以效勞。久之。客得官。羣議咎客。公以書慰之。君果有得。猶我之得。客出。書示。議者乃止。善尺牘。琴弈。諸藝皆過人。不自詫。每言沽名激行。爲之良易。然不可欺於心。晚歲過郡土神祠。桷侍行。指謂曰。吾言出諸口。今得視神無愧。自丙子來。冠屨雜糝。抑負不自振。嘗開釋防漸而扶植之。或利害不便。必正色廣論。絕其萌蘖。乃止。歿之日。鄉里無貴賤。老穉皆驚惋不絕。葬在鄞縣桃源鄉慈溪奧之原。元配史氏。太師丞相忠定史越王浩之曾孫。祖彌堅。資政殿學士。贈太傅諡忠宣。考賓之。朝議大夫直敷文開荆湖轉運副使。再娶楊氏。世儒家。五世入太學。景

定壬戌太學進士太平州判官□□之女。以宋明堂恩俱贈安人。男一。桷。史出。女三。長適丞相史莊。肅公嵩之孫。似伯。前將仕郎。次適工部尚書余天任孫昌期。前通仕郎。次適資政殿大學士史巖之孫益伯。前承務郎。孫男二。瑾。瑾孫女四。長適同知餘姚州事趙孟貫。餘許嫁未行。痛惟先大夫言履。歷歷在人口耳。蚤登臚仕。將大有爲。迄不得展究。尙義勇斷。施止於州里。而中年泊然退靜。莫有知其意者。不肖孤藐然嗣承懼歲月之久。失於傳貽。將益負不孝。願託于立言大賢。以求信于後世。謹述歷官行事。辱賜之銘而傳焉。

先君子蚤承師友。晚固艱貞。習益之訓。傳於過庭。述師友淵源錄。

王鏞。濟南人。侍御史伯庠曾孫。由次翁始居鄞。敦厚寡言。幼師之。精理學。多錄言行教人。不喜矯飾。壬戌進士。

張卽之。參政孝伯子。孝祥從子。善爲頌語。乾道淳熙事。月日先後。亡異史官。李心傳嘗質之。喜校書。經史皆手定。善本。嚴州奉祠。日相過從。有絜疾。語言清整。待僮僕亦然。書蔽其名。書法之壞。自張始。特加太中大夫。以壽終。

趙汝楫。善湘子。爲宰相壻。卑退自修。精易象。有易敍叢書可傳。官至戶部侍郎。晚歲以理財進用。失士譽。李伯玉。鄱陽人。爲右司。論事得罪。後爲禮部尚書。薦以政事可作劇邑。將入政府。卒。

馬光祖。婺州人。號吏師。改署佐其府。性過急。斷決無停滯。一時新進效之。鄉有馬元演。時爲仁和縣。晨坐

麻決事五百。縣大治。改官奏舉。皆出馬公。後爲衢州。坐殺饑民罷。

劉震孫。東平人。忠肅公玄孫。文清公之子。魏文靖公之壻。爲喬丞相行簡樞屬。喬相與劉嘗言。越公尹京。政治晚歲。爲宗正少卿兼中書舍人。知爲諸孫。署刻曰嘉定名臣某有孫敏材。宜理瘠縣。

胡太初。天台人。以清苦自檢。治與處州季鏞同。其父越公門下士。胡晚始自言。事見劉克莊所爲銘。

劉黻。永嘉人。左史出治慶元。于時奉祠山中。以居鄉清修薦。世號六士。

汪之林。里人。龍圖閣學士大猷族孫。爲諸王宮教授。守汀州。晚歲十年不通時相書。逮識樓宣獻公。言出處大致不可易。居同里巷。貧益甚。卒。

應文煒。奉化縣人。精史學。年六十始入太學。蚤游江淮。吳毅甫作相。兄淵守建康不去。應作書諷之。卽謝事。毅甫奇之。招入相府。不顧去。史嵩之罷相。猶子瓊卿上書。或言應爲輔。史相諷所屬掠治。應益忿然。卒得脫。癸酉歲。襄陽降。應言世事已去。先子官金陵。戒毋攜妻孥。凡所言得失悉中。

曹說。侍講粹。中曾孫。父爲山陽佐。死難。幼絕葷葷。精易象數論語詩春秋。皆有解。多折衷舊說。歲一再至。易說爲里人所竊。今不傳。聞在松江儒家。

王先生應麟。兄弟中博學宏詞科。爲翰林學士禮部尙書。咸淳詔册辭命。皆先生所作。著書有春秋攷。逸詩攷。古易攷。通鑑義例攷。困學紀聞。玉海一百卷。文集一百卷。先子命桷受業門下十年。

胡三省。天台人。寶祐進士。賈相館之。釋通鑑三十年。兵難藁三失。乙酉歲。留袁氏塾。日手抄定註。己丑寇。

作。以書藏窖中得免。定註今在家。

吳浚。建昌人。喜論兵。爲建康參議。數凌侮郡將。賈相督師。舟泊龍灣。客謁不得入。吳大慟。賈奇之。後入爲王宮教授。累遷起居舍人。嘗薦先子于陳丞相。入南起義兵。事不濟。議降。文丞相殺之。

戴表元。辛未進士。善論策。失仕歸里。力從諸先生。能古文。爲金陵教授。時與之同官。家貧。衣食葬喪咸闕之。後留塾中。有榆林渠五十卷。

黃震。慈溪縣人。以清介聞。賈相知之。守撫州兼本路提點刑獄。迄不能合。坐論去。性不喜鄉里。獨作書。以所爲日抄一編寄贈。

陳蒙。鄞縣人。國子司業。塤之子。善筆札。治獄多探奇。嘗疑之。後爲淮西總領。以浪用公帑罷。貶建昌。晚守温州。夜別先子行。益詭誕。子孫散亡不可攷。

安劉。汴人居鄞之小溪。以詩義冠多士。善清言。三歷祕丞郎官。素爲賈相客。安以科目自持。卒不得顯用。程鉅夫。舊名文海。郢州人。今居建昌。善鑿裁。爲侍御史時。奉詔徵江南遺逸。首薦先子。以疾辭。所薦士皆知名。多至大官。今爲翰林學士承旨。

謝昌元。資州人。淳祐甲辰別院第一。守封州。提舉廣東常平。幼歲見劉文節公光祖。能道蜀士大夫言行。可傳錄。言蜀中亡事甚慘。僑居于鄞。入朝爲禮部尙書。

青陽夢炎。西蜀人。使李璫。善機辯。賈相愛之。爲荆湖提點刑獄。仕元朝爲吏部尙書。多智。

留夢炎三衢人。事見國史。晚爲翰林承旨。焚香擇吉日。薦先子于御史中丞翰林修撰汪漢卿。與桷官翰林時言之。

趙與巽黃巖人。篤實無城府。睦姻族。與先子俱爲史壻。官京師。歲一遣問。官至翰林學士。卒。

盛夫金華人。邃經學。多本項安世氏。丞相王煥薦爲太學博士。後通判慶元。

梅應發廣德人。與叔祖履道同補太學。爲慶元教授。習詞科。卒不成。官至太府卿。喜抄書。先世書皆傳寫。舒岳祥台州寧海人。七歲能作古文。弱冠謁吳子良吏部。大奇之。吳學于陳耆卿舍人。舍人學于葉適。正則以師道自任。好譏侮。晚歲詩益工。官慶元時。與之游。後作書俾桷往事之。

劉莊孫學于舒。能文詞。深沈善精思。家貧無書。傳五經。能默與先儒合。病廢卒。

樓摯宣默公族孫。精曆法。言宋司天氣朔盈虛。當改章法。不可用。未之信。後授時曆頒言始驗。館于賓州。伯父家四十年。日布算。疑多財者。貧老卒。

應發孫。參知政事懌之子。父爲翰林學士時。能代父書。命後祕其父書不出。好博。以蠱死。

史蒙卿乙丑進士。拙程文。默誦五經。其學喜奇說。禮部尙書王公多傳授之。卒以奇不合于王公。

陳定孫。參知政事卓之孫。爲軍器監丞。家居四十年。歲奉祭祀必哭泣。年八十餘。乃終。

余尙賓。官至太府寺丞。賈相入朝不得調。孝友誠實。鄉里交賢之。

謝翺。南劍人。僧圓志。瑞州人。俱能古文。尙嚴簡。氣鬱不自舒。困死。

周密湖州人。與陳厚、韓翼甫、李義山、成淳初爲運司同僚。俱有吏才。約貴日以字稱。禁近俗名號。陳能文。端明存之弟。韓安陽裔孫。善持守。李蒙邁名吏。壽朋之孫。皆蚤卒。周中丞祕曾孫。晚歲以鑒賞游諸公。微失雅道。

葛慶龍南康人。寓居四明僧舍。精唐律詩。酒酣能飛筆爲數百言。然棄不復錄。有什一集。極精警。游越卒。

先夫人行述

嗚呼。桷始生之七日。已不孝。罹禍于先夫人。音容永隔。無所容罪。每侍先大夫。嘗語曰。汝生之年。歲大熱。丙寅爲火。協于支干。臨安居。民繁湫。坐地沃水。猶喘息不得止。茵席器案如執焦。汝母體素弱。一夕暴泄。輒不可藥。目光已離。猶視汝在襁中。復愀然曰。桷來前。念至是。曷時可忘耶。桷泣而記之。又曰。大父嚴州。與汝外大父敷文公最相好。伏臘治具。悉相似。商榷品目。議論好惡。無一不脗合。汝祖母王令人。史太師甥孫。故於敷文通姻。好益密。淳祐辛亥八月。敷文病瘳下。嚴州日問疾。敷文力疾言。吾有二兒二女。皆未姻。願以穉女。屬公幼子。吾時年七歲。汝母年六歲。是月嚴州治幣問名。閱七日。敷文捐館。嚴州歲時往敷文家。撫汝母。候筭期。以主我中饋。又無祿。嚴州卽世。景定辛酉歸于我。史氏號大門。伯父賓州嚴峻。汝母屈意朝夕承候。無替惰。分至大祭。盛服俟廟門。陳器薦牲饌。低首偃立。終日不少動。性絮靜。無華飾。從母廣國夫人。爲昭化軍節度使謝公埜配。貴家競侈異。獨無纖粟模效。每一詣親黨歸。悉脫去鈿鬢。嘗言教兒嬰孩。必蚤加訓整。庶無爲父母羞。余年少時。習騎射。必正色切劇。或從廳屏偵問所與交。有凡近者。卽

掩被就睡。明日徐曰：先丞相家無此客。先夫人少母張夫人所出。張夫人生二女，長適謝公。先夫人既卒，謝公日迎張夫人。張夫人不肯去。泣曰：吾一外孫，曷忍去？卒撫字，見桷有室。張夫人言外祖敷文方死時，汝母坐牀下，泣不置，勸之食不食。終日坐殯次，不離。服除，一詣庶母房。至嫁日，始再詣別之。家人莫有識其顏面者。桷既長，舅氏軍器監丞柳州某言：忠定越王淳熙中，召赴德壽慶壽班。孝宗曲宴，問曰：太傅幼子今何姻？忠定謝不敢。孝宗曰：吾爲太傅成之。是時崇憲靖王伯圭女方笄，卽封新安郡主。以嫁忠宣。是生敷文。敷文長外家，出宰武康縣。縣滿始歸里。敷文言吾祖暨外祖皆真太師。汝曹當謹擇婚對。今甥已克堪問學，慎毋忘外家。敷文嘗言而母幼靜簡，當有成。竟迄不享年。幸子在，猶能慰吾意。夫人諱棣，字景華。以宋明堂恩，追封安人。謹按史氏譜有舉八行者，諱詔，贈太師冀國公，爲五世祖。曾大父諱浩，舊學相。孝宗純誠厚德，歷三公。以太師保寧軍節度使魏國公致仕。追封越王。諡忠定。妣貝氏，封齊魏國夫人。伯祖諱彌遠，相寧宗。理宗太師中書令。祖考諱彌堅，資政殿學士光祿大夫奉化郡開國公致仕。贈太傅。壯歲尹臨安，帥湖南，多異政。中令爲相，歷年滋多。太傅不復肯仕。家居十餘年。端平改元，諡忠宣。妣趙氏，新安郡主，封衛國夫人。考諱賓之，朝議大夫直敷文閣，荆湖北路轉運副使。少事丘文定公，宗以政事稱。六爲郡太守，贈通奉大夫。妣王氏，恭人。丞相忠定魯公淮之孫。妣葉氏，恭人。俱贈碩人。丙寅歲冬十一月，葬于鄞縣通遠鄉建輿之原。卒時年二十有一。後三十有三年，先處州不祿，懼體魄之不寧，遂別葬于桃源鄉慈溪輿之原。先處州諱洪，朝列大夫同知處州路總管府事。曾祖諱昇，贈太師衛國公。祖諱詔，同知

樞密院事。資政殿大學士。銀青光祿大夫。奉化郡公。致仕。贈太師。越國公。父諱似道。朝議大夫。知嚴州。贈中大夫。男一人。桷。女二人。長適丞相莊肅史公嵩之孫似伯。前將仕郎。次適工部尚書余天任孫昌期。前通仕郎。先大父晚得女一人。適資政殿大學士史巖之孫益伯。前承務郎。孫男二。瓚。瑾。孫女四。長適同知餘姚州事趙孟貫。餘許嫁未行。私念桷孤苦不自振擢。揆厥有生。與先夫人違棄之日俱積。今宰木已抱。過庭之訓。懼無以貽子孫。敢求偉於文詞。敘而銘之。庶得以永考而有傳焉。

亡妻鄭氏事狀

亡妻諱某。姓鄭氏。鄭爲明州令族。世家于鄞。始自元祐舉進士。至宣和時。其孫入辟雍。有諱某者。當孝宗時。爲郎曹。守平江寢著。至太師尙書令忠定魏郡王諱清之。以舊學相理宗。官簿益盛。故君之七世祖。至高祖。皆贈太師魯國公。魯公長子某。國學進士。贈中大夫。妣邊氏。封太碩人。魯公配臧夫人。素嚴。忠定之生。夫人將不舉。邊氏亟詣姑取保乳之。長歸于其姑。後碩人生子諱某。與忠定同登嘉定丁丑進士第。邊碩人卒。忠定爲之服衰以報。其子亦官至中大夫。祕書監寶謨閣待制。以終於君爲祖。贈正奉大夫。妣汪氏。封太碩人。待制生子諱某。朝請大夫。直祕閣。主管建昌軍。僊都觀。於君爲考。妣汪氏。封宜人。淳祐中。忠定以師臣再相。年益高。祕閣入閣承侍。裨贊可否。務總約體要。纖秒不以類。于時賈相帥京湖。數張皇軍旅。邀國用。朝廷抑不下。賈相恨議由公出。辛亥歲。丞相薨。庚申。賈入相。由是積二十有三年。不復出仕。先處州由太社令奉祠里居。祕閣公多能言臺閣舊事。數往還。是時祕閣新喪子。無他嗣。庚午歲。乃得君。客

至。嘗抱立左右。錦襦珠髻。注目不聽去。處州戲曰。他日願以爲子婦。祕閣愀然若有屬。癸酉歲。處州通判建康府。將之官。宜人與祕閣餞飲于中堂。共指桷曰。誠宜爲吾壻。是歲祕閣與宜人俱捐館。居第在城東門外。乙亥。兵難作。先處州以其遺言。謀于其宗長。始歸于我。于時袁宗猶完盛。先廟祭祀。娣姒林立。能卑順盡禮。朔望承問無缺。息事桷外。祖母張夫人。甘柔涼燠。調適以宜。張夫人嚴整。語相家內儀。和珍組絲。皆精巧有度。君能耳受目悟。而敬成之。張夫人病革。視藥膳。連月不入寢處。嘗曰。新婦不獲事先姑。得事夫人。斯可矣。性靜厚。寡言笑。遇事不輒發。而是否瞭然不能易。故處親黨無閒言。處州幼撫如己女。君偵顏色。承事幾二十年。絕纖粟忤意。己丑。城中災。遺物散燬。先處州以它事往吳杭間。意忽忽不樂。間治鱸具。能使如平盛時。祕閣所後子不自振。君深憂之。竊從招提。命所子。歲時以祀其先。大德戊戌歲正月。君產女。病榮弱。桷主史甥姻于杭。二月十日丁卯。亟歸。視之則已不及矣。大禍仍構。又八日而我先處州亦捐館舍。噫。念昔少時。私欲奮勵學問。以自振植。先處州愛之。乃悉總攬酬酢。俾不以亂其心。不幸志昏能薄。一無所成立。四女二男。皆君所出。紉箴訓飭。復能相其夫。使有所不知。及今一十有七年。從宦京師。藐然孤身。若忘其家。缺內佐之助。靡密總錯。日益加多。而學益以落。文誠不能以表君之志。敢求於故家之友人。精於言詞者。誌而銘之。君葬在鄞縣桃源鄉潘奧之原。男璫。次瑾。女一。嫁餘姚州同知趙孟貫。餘許嫁未行。桷今爲翰林待制。是爲先樞密太師越公諱詔之第四曾孫。先嚴州中大夫諱似道之嫡孫。先處州朝列大夫諱洪之孤子也。

外祖母張氏墓誌

外祖母張氏諱致和。湖州德清人。嘉定六年七月生。父某。事趙崇憲靖王父子。再世部樂伎。年七歲。通音律。桷曾外祖母新安郡主。歸崇王家。見而愛之。載以歸。俾事外祖。敷文轉運史公稍長。爲侍姬。戶室靡密。總覈合繩墨。外祖性嚴急。挈長覆短。使不有忤意。囊篋甲乙。隨旨諭立陳于前。如是踰三十年。生二女。長和政郡夫人。嫁太尉昭化軍節度使謝堃。次卽先妣。會稽郡夫人。歸于我先考諱洪朝列大夫處州路同知總管府事二女皆嫁宰輔家。于時謝以后族貴顯。先處州官臨安常卑讓疏之。外祖母雖久居相門。見謝壻侈靡踰限制。心不樂。而多留處州。以靜恬自怡。咸淳二年丙寅夏六月。會稽夫人實生桷。甫七日。洞下遽卒。又未幾。先處州病大熱垂死。咸言不利於母。將及父。謝公願取己育之。處州在病。搖手不許。外祖母排斥詬詈。戶之。遂日訓飭調適。且祝曰。兒宜爲史氏外翁自重。八年。謝公死。泣曰。吾固審若是。吾盡力撫袁氏外孫。他何之。訖見桷娶婦生女。至元二十四年二月□□日卒。年七十有五。葬于先夫人墓左五十武。幼通書算。善心計。處州事有未及。始諷之。終以舊事敷文者言之。晚歲病瞽。纏纏言外家事曰。汝外曾祖太傅忠宣公居東湖滄洲。十有四年。不復仕。作書諫兄忠獻辭相位。不輟歲賜。生日器幣。辭一再始受。後數年不復受。鄭忠定丞相。忠宣公塾師也。敷文受學焉。其舊第前爲舊學壽皇書。後爲授經鄭相書。皆有深旨。又曰。音樂慎勿蓄。今世公卿女樂。皆俚野不足聽。惟太傅壻趙崇王悉祖樂髓。景祐譜調八十四。穿心相通。嘗曰。譜與易合。吾不知易何圖可合。汝識之。又曰。丁抗掣曳大住。小住爲喉舌綱領。法曲

散序。忠宣刪正之。曲有均。猶韻也。疊疊貫珠。韻不絕也。聲有盡。拍以度。非句斷也。于時周待制邦彥孫琦。於太傅爲中外表。太師越忠定王。嘗命譜清真詞。手筆具在。今付汝。雖不解。慎勿墜也。舊以恩賜紅霞帔。再封孺人。記曰。庶母不祀於孫。而復曰。祔于庶祖姑。古不墓祭。昔之大賢。嘗慊然矣。今夫禮緣於情。而義以制者。懼後之昵於私者之過也。先王營丘壟之大小。無貴賤。慎其始。不幸有沮洳崩齧之患焉。其修之也。必有道。是則於吾外祖母。非有過者矣。以孤兒傳處州。考其所自。曰。外祖母保鞠之恩重。桷二子。瑾。將竦然。以加厚外祖母。有田若干。足以治墳壟。奉春秋。刻于碑陰。懼瓘。瑾之子若孫。滅其情義。必曰。禮有所不載。遂具昔之訓。撫行事。立石于墓。俾勿墜。某年某月某日。外孫具官袁桷謹誌。

